

無錫金匱縣志

卷之四三二六

孝友

行義

耆碩

隱逸

藝術

術數

工繕

醫

琴棋

篆刻

廨算

ル 5

3047

10



門 6
號 2300
卷 10

門 5
號 3047
卷 10

門 6
號 3000
卷 10

無錫金匱縣志卷二十四

孝友

書云孝乎惟孝友于兄弟蓋孝弟者為仁之本也漢時已有耨鋤箕帚之語輒近俗益澆漓然鄉曲委巷往往有不讀詩書而至性過人有足多者豈非良知良能出於愛敬之真者然耶割股廬墓或者病其近名而前人紀載多及之士生三讓之鄉可以感發而興起矣志孝友第二十六

晉

華寶父豪晉義熙末戌長安時寶年八歲豪臨行謂寶曰

昭和九年
六月十八日
購求

須我還為汝上頭長安陷豪歿寶年至七十不婚冠或問之輒號慟彌日不忍答也建元三年與同郡薛天生

劉懷允並表門閭

南史有傳

宋

許九田家子早喪父獨與母居涪化三年饑九往來城邑求食養母人厭其數斥之九念母終不得食哀痛不忍俱死因持斧自斷其手手斷血不出人皆異之爭餽之餐母子得全進士孫浩以其事聞於令令謂九傷毀支體不孝逐之浩與俱去常州留養於家九每與母同出累日不至浩所浩問之曰所得幸足供母不欲數累長

者浩益憐之為置緇衣衣之居歲餘母死九服所得緇衣漆其斷手口誦浮圖言與母俱卒

張奭字公奭父歿廬墓三年墓側產芝鄒忠公浩為作孝芝歌

元

張阿蟠生甚微致和中歲饑從父母就食晉陵父歿家益貧蟠方成童傭於馬氏馬染工也蟠因善其業主愛之歲益其傭直蟠乃盡其所能得以厚奉母暑月夜自焚艾以驅蚊蚋窮冬雨雪鑪未嘗斷薪積二十餘年母年六十五而歿昇喪歸葬哀動路人

李元昭字伯昭晦子嘗爲慈湖書院山長父歿哀幾滅性廬墓四年墓有四大樹元昭結巢樹杪而寢其中冀風雨晦明見父魂魄也晨暮悲泣羣鳥和之當路聞之辟命日至終不出

華幼武字彥清父鉉早卒母陳以節著幼武幼與羣兒戲於庭聞母語生平事輟戲而泣母問之具道母言痛切於是母亦泣事其祖若仲父至孝羣從未嘗析產異居母老喪明曲爲承順以舒其鬱及母得旌構貞節堂春草軒以居之晨夕左右終其身幼武工翰墨以詩聞於時與鄭元祐王逢陳基輩友善春草軒成四方名流題

詠甚富士大夫豔稱之子惛見隱逸傳

明

尤良字心之失愛於君母姚而事之彌謹姚病刲股療之元泰定三年解元入明累官至太僕卿洪武六年卒官上嗟悼不已賜棺斂銀五十兩遣祭龍江關舟次詞官撰呈祭文不稱旨宸翰親爲之蓋異數也

王建字建極達從兄家貧三十未娶舅氏朱以女字之會母病二年卒服除將婚而父病又久之亦卒廬墓六年夫婦皆年逾四十始成婚

李步行城東賣菜傭也早喪母每晨出鬻菜得錢以奉父

父嗜酒飲之必歡未嘗暫缺見時物於市購以進雖高價不少後體無全衣而父周身之具無不給一時鄉里中子有不順者人輒舉步行名誚讓之

錢璧鏞子鏞以建言戍蜀璧隨父往間歲一歸省母後鏞老請代任戍役鏞歸而璧死於戍鏞季子瓊方遣戍時瓊纔數齡既長知璧乞代父死事輒痛哭璧死例以親子姪代有司勾捕璧子瓊慷慨代行隸戍所亦歿於戍陳阿皮早孤養母母死而貧迺鬻身營葬嘗墮大水人莫能援漁人網得之得不死人皆謂至孝所感

華興義字仲模幼武孫洪武中父被誣繫獄興義才弱冠擊登聞鼓請以身代辭極懇摯上爲惻然命原其父

安宙與兄宇篤友誼洪武中宇坐糧長事論戍雲南宙念兄老請代戍挈妻與長子斌行留幼子或守墓或長誓尋父母行次楚雄衛得之父促之歸及再往而父歿母亦尋歿與兄泣別攜父戍稿繭居吟以歸

時亨字待菴性至孝父卒亨哀毀骨立三年不挾纊絮不食梁肉人稱時孝子洪武末郡以楷書薦授臨江同知潔已愛民以疾去官

陸平字公愷母久病平以憂成目青一日爲母治刀圭手授金櫻子誤拭目目頓明母亦尋愈永樂元年以貢入

都對策稱旨爲浦江知縣訟簡賦平仕至工部郎中晚年精求性命之學

金華府志有傳

鄒暉字允章父近仁早卒暉事母錢至孝母邁末疾剖股作糜以進獲痊孫永章亦以孝稱

褚鳳字廷儀諸生父伯欽年八十而病弟幼妻又死鳳旦夕扶侍清明父命祭掃比歸父死於鄰火鳳卽日葬父遂斷火食惟飲水噉草木根皮傭書得值悉爲松楸封樹之用踰半年事畢告其弟曰可自圖早娶以延父祀遂負薪於墓聚而自焚宣德九年十月朔也時有陳智沈椿沈榛魏忠皆食貧而賤以孝聞

莫昌字順甫田廬悉讓兩弟季弟義甫在金陵邁疾昌兼程往視疾衣不解帶同舍生有病者其親屬畏染不顧昌拯療之如弟皆起時謂有薛包庾袞之風當道薦於朝辭不就

全純字原赤事母盡孝母卒哭歲餘而瞽鄉里聞於官巡撫周忱餉粟布固辭不受曰使純能孝則目不盲矣忱歎曰如是純目當復明已而果然

楊琛字叔獻景泰五年進士厯官禮部郎中引疾歸琛性孝友父歿嘗廬墓三年治家敦睦五世同居無間言或問曰食指逾千雍睦如此豈得忍字力耶琛答曰忍不

可久惟無隙斯善耳

吳傑字世雄館於武進胡忠安澹家歲餉甚厚洗腆養母如富家母終時傑年七十三矣持喪孺泣廬墓終身

秦旦字永孚奭字仲孚以字行父旭見隱逸傳兄夔宦於外旦奭家居侍養四十餘年父嘗患心疾醫謂得人胸間血迺可療二子爭剗胸出血和酒以進父疾竟愈母傷膝創潰二子以舌舐之旦忠厚沈默擇言而發奭直諒工於詩操行異而俱以孝稱憲宗旌其門曰雙孝曰子鏗奭子鉉亦有雙孝名鏗別有傳

永孚仲孚見明史孝義傳序

唐恒字公常年十六喪父惟寅哀毀骨立事母周至孝成

化十七年七月大雨水裂龍山之麓而出惟寅冢當其衝恒負土填壅不克又貧不能改葬亡何母病且屬續謂恒曰冢陸沈奈何恒痛母言卽以銀鐙繫頸仰天誓曰恒不徙墓不去此然力終不辦後六年恒病革其戚友將爲脫之恒捫鎖淚橫下曰吾脫此何以見吾母地下竟抱鎖死有司上其事未受旌正德中巡按御史聞而祭之

虞廣字以勤成化間父戍遼左母免僉行廣歲一往還以爲常父卒負觀航海颶風舟覆俄有神出柩洪波中卒獲南合有兩地承顏卷傳於後

蔣朝憲少失父母哀慟死而復蘇貧不能葬席藁枕塊者三十餘年或問及先人淚迸注不能語邵文莊寶亟道其行衆感而賻之迺得葬

蔡孚字信之官蘇州衛指揮使事節母陳五十餘年以孝聞與弟濟終身不析產築宗教學堂以收族人不能力學者教之

秦鏜字國和旦子母張病痿且瘖鏜以意揣其所欲而調護之坐臥躬自抱持積十九年不懈鏜宏治十七年舉人自母病不赴禮部試比母喪服除而鏜年已老授南京都察院都事卒從弟銳夔子官浙江布政使都事執

喪廬墓事母至孝鏜子淮父疾會有試事父趣之行乃陽治裝而潛留省侍後官辰溪知縣見宦望傳淮弟瀚有文學爲姑後於吳往來定省亦以孝稱後復姓

俞鏜字武元性至孝家貧授經以養督學御史廉其狀俾越次補貢入太學以母老辭不赴旣喪母廬墓四年始就試順天宏治二年舉人授長興教諭卒邵文莊寶及吳學張愷皆出其門

秦勵字邦哲以諸生貢太學謁選而父歿遂誓不復出築室父墓旁歲旱水涸忽有泉滂然衆賴之名曰孝子泉浦瑾字文玉宏治中南塘火風急熾甚將及瑾廬父柩方

在殯瑾呼天叩顙血流被地左右鄰皆燬而浦室獨存
瑾博學與邵寶善舉正德十六年進士知麗水縣受事
三日疾作仲子應元手狀走當道爲父乞休並日夜哭
泣禱於神求代而瑾竟歿應元自經死處州知府黃體
行上其事於朝而特爲之傳瑾門人華諫正德中舉人
亦以孝聞

錢鉦字允宣本姓華參政津之子幼育於姑遂母其姑而
父姑之夫曰西園處士鉦事之孝嘗再鬻股肉愈母疾
處士晚舉子鈺鉦翼而教之鈞亦有至性老人相繼歿
鈺鈞哀毀廬墓六年

吳汝憲字道卿兄某嘗坐事繫獄汝憲因自囚一室藉草
食糲一如獄中人勸之輒泣兄釋而後出
折足者子嘉靖初人父折足而老子負之乞於道得少物
必進父父有遺餘子始食歷十餘年折足者死子慟曰
父在冥孰負之者遂死父旁

陸爻字時貞家貧力養母母年七十嘗病爻夜禮北斗及
東嶽願以已算益母周旋坐起十餘年而卒同時有張
麒者市民也兩割股愈父疾爻有子爲父請旌麒竟無
人知之者

麒一作麟

浦劭字成德父應虞諸生嘉靖三十三年夏倭寇自常熟

入境掠村落劭與弟濬掖老幼匿僻阻處旬日賊稍稍退應虞潛出探之猝遇賊隊之失道者牽去令荷物前行時劭濬並先他往劭適還不見父惶遽望賊隊直前叩其酋道父狀貌請以身代酋感其誠使釋父去而劭不解倭語猶以為未釋也厲聲請不已賊怒刃之聲愈厲遂亂斫之死比賊去濬甫歸急往跡之屍解為七迺斂而葬之石室山下應虞為劭主寘牀頭出入必呼而告之曰老人無恙萬歷四十三年旌劭妻過亦以苦節旌別有傳濬授經養親每以劭身後名不朽為親慰時亦稱雙孝云

明史附楊通照傳

俞紹祖鑑曾孫嘉靖中倭躡江南父貫病癱不能行紹祖倉皇負貫竄匿遇賊將殺貫紹祖號哭請代遂遇害賊棄貫於途遇老僕負歸

蔡元銳國子生居控江門外倭亂具舟奉父軫入城父未即行賊掩至迺與弟元鐸將翼父而升諸屋銳遂為賊所執殺於道中鐸以父免未知銳死明日持金詣賊贖兄因并遇害事聞旌其門曰孝友

明史附王在復傳

嚴朔字子期七歲而孤與兄皆撫於叔氏朔奉母周至孝周病甚朔中夜具衣冠露禱請以身代母病果愈既而朔疾勢且劇意謂此必代母當爾卻醫藥不御久之亦

愈叔氏卒無子朔以次當爲後兄窺其遺產厚欲專之朔曰幸甚吾後吾父又何求焉悉讓之不取爲里塾師以給母方教授邑西滸溪橋倭至人驚竄遇賊被執使爲導不可遂見殺子一鵬

李繪字承曾父望病浹月不弛帶歿而三年不弛哀兒子明徵少孤縣僉爲糧長繪曰孤兒當此立槁矣請身代之遂傾其家不遺尺土卒不悔子應祥

王宗字振之父伯常世雄於貲以俠敗妻死自傭於惠山僧舍宗年十三慟哭迎父歸止於外家旦暮負薪以養既二年拾遺囊於道俟其人至而還之則報以三緡受而買二驢負載取直以養父又十年始僦屋三登里娶妻生子痛母早世終身不飲酒食肉當宗策蹇時有富民張江者齟齬之宗大歟後江與強銘訟不相下會銘一奴死誣江殺之知宗之讐江也餽之金而引爲證及就訊宗慷慨明其始末還所餽金於官修三登倉人皆義之其子曰澤澤子召問問見儒林傳

衛邦青城鄉人與弟國樵五浪山中遇虎伏巖下相去尋丈邦曰吾兄弟不兩全矣我已子汝方婚可速去國不應持刀大呼赴之虎奔逸皆免

沈璵字子美五歲喪父家貧母李苦節撫孤勤十指資遣

璵學璵魯鈍不能讀書比長又弱不任耕自恨無以活母偶過橋於泥中拾銀一大餅因坐待遺者拭之見面有天賜節孝四字迺持之歸里人異之有費醫妻以女璵傳婦翁術家稍裕極意奉母二十年母歿斂葬盡禮璵尋死妻費從死遺孤偉五歲相傳湖州客攜去補弟子員

吳聘字子來有義行以孝聞學使者將越次貢之辭不可遲之又二十年除京衛武學教授遷南國子監典籍會滿考請移贈其父而格於例聘泣然曰吾先人終布衣地下乎爲子無狀敢濫上恩遂并本身告亦置不請仕終廣州通判初父年大耋而困末疾聘晝掖以行夜伏身伺喘息冬月體溫溺器以進凡十餘年

林沐字自新父死而貧營什一以養母兼撫諸弟其季賈荆襄罄其貲被惡疾以歸沐匿之別舍療治旣瘥迺引見母且更資之母嘗患疾暑月思黃雀又冬思蟹沐求皆得之母壽八十餘臨卒謂沐曰爾眞吾孝子願而子他日事爾亦如爾人因呼爲林孝子

黃應元字岵瞻六歲喪父母楊守志積四十七年應元事之未嘗幾微失母意初就外傳與羣兒戲母見切數之繼以泣應元自是終身不事嬉遊

華祺字永年行三兄弟四人父歿母以祺有幹才家事悉令祺職之祺輒歸美於伯兄仲失歡於母母怒仲祺必跪解杖必身蔽之大父析諸孫產祺與仲共宅仲所受有母構者母弗予祺遂與仲易居仲歿以孤屬祺祺謹護之逮其成盡返所有祺仲父秘書某貲鉅萬無子祺當立以讓季季歿復撫其孤如己子

王望道字懋及諸生兄立道卒於京望道走二千里以喪歸割腴田與兄子而自承其役奉母孝爲上林苑丞數年卽乞歸養子化醮諸生父疾不解帶數旬鬚髮盡白著有百花鼓吹梅花鼓吹採入四庫書

張明卿字與時萬曆四年舉人母早卒事父晨夕不離不赴禮部試以純孝稱

周後字養蒙弱冠喪父里有莠民構其弟訟後於官而牟取其利後遽析已產之腴者予之計沮亡何又構其弟與他族訟數年產且盡則奪後田百畝以媚勢家及後疾猶再受弟訟後終不爲忤將卒誡其子善事而叔無銘吾墓以彰厥愆孫懷忠字士克諸生孝友如其祖哭父至失明弟爲豪家齟齬懷忠傾囊護之豪亦感化子公謨

鄒忠字顯之髫齡卽以孝聞稍長貨無私畜食無私奉務

當其親心歲捐租什一爲賑歉歲十二里無饑人邵文莊寶爲作務本堂記兄賢字佑之亦嘗出粟千石以賑饑又獨出貲刊邑志平生多奇節偉行兄弟友愛無間言

賣饀陳孝子其事蹟不可考邵寶嘗作詩稱之有苦哉孝子心一念通神霄之句

邵天祿者葉茂才同里貧無妻鬻鐵鋌子爲生鐵鋌子者俗紡具名以受緯腸者也少喪父竭力畚築以葬奉母日具酒肉而已饜粗糲每夜歸必秉燭娛母眠依母榻四十餘年里人化之知縣鄒墀以天祿名上副使旌之

茂才嘗作邵孝子吟

鄒龍光字彥爲萬曆八年進士官中書舍人父宦楚豫留龍光侍大父母以孝稱著有尙書約言弟鳳先知安仁縣居官清白嘗入慎交社子宏基亦敦內行

惠仁市傭也父早卒母姚仁以傭錢養得酒肉必懷以奉母母眼畏烟貿桑粟爲薪價倍他薪弗計也母年九十跪求畫工寫像母死假貸厚葬之對母像出反必告得酒肉必布像前如生時又有朱可爲者新安鄉人事母以孝著巡按御史給之冠帶

過對揚字獻可萬曆二十五年副榜父疾中宵籲斗以身

代妻劉氏以完節旌子松齡

嚴紹宗字與德一鵬子少負才名天啟元年中副榜後襲父蔭父年近大耋無他兄弟遂絕意科舉亦不謁任子選居家侍養明季人獲踊貴斥產以給不使父知一鵬晚沐存問營建綽楔以迄歿後請卹治葬諸費甚鉅比畢則負郭田盡矣紹宗衣冠修偉晚益貧鬻宅居城隅別業病革謂其子曰死必葬我陽溪父塋子福孫繩孫張星字楚垣從高攀龍學偕友談高受兄弟敦行朱子家禮家貧養親一資館穀母莫病刲左股和藥進之又病刲右股肉以進皆立愈巡按祁彪佳予獎

高士鶴字聲野攀龍幼弟事生母盡孝嘗語其妻曰子有三母母惟一子耳有兄六人事之皆得其歡初遊太學與海甯許令典善及令典來知縣事敦舊契而士鶴一無干謁人兩賢之子世泰

高應豸年十八聘妻王氏卒會父病須其痊續婚竟不起應豸遂不復娶崇禎中旌

陳志夔業賈事父生死能竭其力崇禎中旌庚午以建儲恩給章服

秦爾載字彥熙事所後母談與其生母吳交盡其力吳嗜芡吳亡爾載終身不食芡師事高攀龍篤信好學卒年

僅三十三攀龍志其墓子鏞

唐起龍字于震諸生父子三世以孝聞父疾起龍旦暮顛天四閱月兩膝腫裂高攀龍志其墓

葉光輔字調耕茂才子少從馬世奇遊以父蔭得官不就崇禎初伏闕上疏爲父請祭葬旣得命廬於墓額其楣曰水天菴一日肅衣冠祭畢飄然出門有頃求之已死舍後池中

華自明字以允同母兄死族以里役困其子自明任之異母弟已析產復全畀以母所饑產其婿王永吉官儀曹歸奉儒士劄并冠服進卻之子瓏字龍叔亦以孝友稱痛上世春草軒遺墨散失購之累年由是鄭元祐黃潛危素黃師泰諸名人所作詩文凡十餘家及圖畫盡得之建保墨閣世藏於家瓏子章志

凌小道農家子父八十不能自臥起寢以矮牀父澡浴小道蛇行負而下上妻亦孝

鄒莘字莘野諸生天性孝友兄某爲富人所訴縣捕之急莘代繫數月乃釋無怨言治地得父藏金二百三分之與兄及弟不以私弟拱辰優貢生恬介有守

陳官奴早失父日磨豆斗許以養母妻忤母立遣之獨居三十年寒餓自甘罄所贏供母母年九十餘官奴七十

餘孺慕如初

陳景仁字長公母老晝常臥景仁旦夕踞牀下挾匕箸進食以爲常母死遇諱日必慟

陳悅谷賈人子有二弟父鍾愛欲私厚之悅谷時納錢父處父得行其意父好遊而嗇於貲每風日晴美先厝錢酒家迺屬父所善友挾以行父樂之以爲友真知我也單可觀早喪母父衡陽義不再娶可觀亦不娶寢處與父俱父歿悲慟而絕

岳呈祥剗股肉起母疾經三旬創沸不可支妻怪詰之發視口如杯椀血淋漓駭曰何不急救治使至此呈祥愴然曰吾聞爲此者人遲知一日親衍壽一歲故默忍耳其後爲親剗股者有蔡志儒蔣元祖顧坦如許明雋殷允升俱以孝行稱

楊紹祖諸生事父母有至性妻亦孝崇禎中舉賢良方正以親老不赴巡撫祁彪佳又以道明德立足表人倫薦後有秦翔龍字神之家酷貧奉父正道母丁極孝先後兩剗股以愈母疾婦孝亦如翔龍

呂鳴廷字爾嘉諸生父疾篤命之娶涕泣請緩父遽卒天啟元年也江南譁言采選室女一時嫁遣殆遍母迎婦入室鳴廷痛不自勝曰父疾而命之娶猶弗忍今父方

歿而忍爲此乎苦塊終喪又數月始告廟成禮

陳國賢靖海門外賣菜傭也慕李步行之爲人事母亦以

孝聞

湯時化有至性妻初至卽以孝事舅姑爲戒妻未接語面

猶慙疑其色忤遽遣歸久之舅姑慰之復還室母病時

化剜肉進之立瘥時化常拾遺金守三日俟其人返之

平德清字君甫父病篤禱東嶽神廟願減己算益父算歸

而父已霍然弟與子俱患痘甚危德清禱曰吾平氏三

世皆一身脫不兩全寧殤子無殤弟竟俱生

秦孝維字善先性淳至事親孝親歿廬墓三年與龔廷祥

高明瑤友善及二人殉難遂晦迹斗山不見一客

秦詔字寧侯諸生七歲失恃欲以身殉弱冠潛心理學爲

明心錄采古今格言爲省心錄又善以方藥活人或遇

顛連煮糜給糲無倦色

李炘字介臣生崇禎末父母死於兵炘於積骸中刺臂血

徧滴得骨以歸葬

丁巫

俗謂祝獻

四子大虎小虎阿旗阿皂世嶂喇灣人共竭力

田作具酒肉以養父父病大虎禱夢於神神語以股可

療虎不解股是何物訊山僧得之四子爭割以進父愈

後父死二虎悲哀相繼卒

國朝

虞爾忘爾雪膠山人父罕卿充社總國初多盜晝殺人膠山盜胡鮑三爲之魁罕卿計團鄉勇行往白縣中途遇一村少戟手罵賊罕卿意其罹毒也語以故且告姓名村少謝曰幸甚再越宿罕卿還自縣聞門外遽呼虞罕卿出見卽所遇村少也左右皆操刃立縛罕卿去是時二子方田作比婦女奔告二子急荷農械馳救父父已死團塘橋下矣順治五年六月三日也於是二子收父尸斂葬密求殺父者主名且泣曰團鄉勇父志也縣批故在遂相與招徠部署立團冊王子於團首自署名曰爾忘爾雪警忘仇冀雪恨也於是遠近響應鄉皆連結盜失勢纍纍見獲凡獲盜必詰殺罕卿者乃知前村少者胡鮑三養子杜息也三走江陰斃於獄而息謀入海與所左右二人夜治行爾忘爾雪偵知之饗壯士使躡後而身掩至息家息就縛并縛二人牽至罕卿死所比明爾忘歸抱罕卿木主至爾雪熱釜其旁爾忘截息舌釜炙以祭爾雪不勝憤取心肝炙之且祭且噉衆亦爭鬻食之爾忘迺斷息頭懸腰間將及二人其一人已膽裂死一人乞哀遂沈之河爾忘爾雪懸息頭於父墓再拜瀝酒大慟乃歸是爲七月十六日自後邑境亦寧

秦鏡廷珪長子順治四年鏡省父長沙既至見父已殉節死撫棺號慟亦死之康熙三年鏡幼弟銳間關往訪始得御父兄柩以歸

華世燿字公聚少孤又失母庶母金撫之世燿事之極誠敬兄歿覆露其遺孤周貧窮鄉里稱善人時值鼎革鄉盜橫甚戒毋入世燿門

秦重采字幼儀居親喪哀毀盡禮家人失火逼母柩采憑柩哀號火及簷而返事兄嫂如父母子弑

劉果遠字干之順治四年進士累官湖廣提學僉事事母至孝俸餘所寘產悉與弟分之

侯曦字朝賓鼎鉉子順治十五年進士鼎鉉令黃岡母王未赴留曦侍養曦聞寇警走二千里省父於危城中寇退始歸父歿遺命葬祖塋形家言不利長子曦曰吾遵治命非邀福也父有田三頃命諸子中得第者與之曦不專受分給其弟從弟卿瑩幼孤多難曦爲殫力保持卿瑩歿又撫其子子麟然亦以孝行著聲鄉里

浦佑昌字時泉篤於倫紀鄉里稱之子日新孫長發皆質朴長者

吳繩泰字爾忘少孤事母孝析產推大第與弟姊寡養之終身官萊州推官忤上官意乞歸晚罹家難北行歿於

道第三子德全年尙穉呼老僕楊槃走數千里護父喪還

王允持字簡在康熙二十四年進士當授知縣以母老歸工詩詞篤於孝行一日手書數十行付諸子皆身後令奉養大母事未幾卒

陸士奎字聚五六歲喪母感丁蘭事刻木爲母像像成會母諱日抱像而慟像亦隱隱含淚父豪飲喜賓客奎值佳時雖甚窘必質錢置酒致父所知愛博父歡奎亦善飲不飲以供父奎故貧授徒以給云

虞官臯字汝明生五十日而孤母吳茂貞以養以教官臯習母訓篤倫誼卹寡庇孤恩浹宗黨嘗集格言名曉孤錄子銓諸生官臯卒哀毀成疾未幾亦卒

邵可學興道鄉民負販養母一言不苟嘗冬月出販母問歸期以明日對會大雪就販卽還及到家恐違信又更深不敢驚母寒檠匿檐下明日迺入知縣吳興祚獎之魏廷球字商玉黃巷里人嘗割股療母疾後母疾復篤爲血疏禱神請代母等愈而廷球竟死康熙三十三年事曹童子者父南郭外墾工也童子方五歲父或扃戶出則竟日不食鄰舍饋之輒搖首泣俟父歸同食未幾父死童子嗚咽匍匐死父旁鄰人斂之康熙四十年間事

仇斌本姓杜事所後父母極謹父嚴冬患痢斌侵晨取中
帚廁滌冰罇兩手瘳瘵不怠也母嗜果未老齒齧雖
果之不可熟食者其妻必蒸以進鄉黨以爲斌之孝於
其妻益徵之

王晉錫字受茲父客荊州更娶小妻寘家焉時西南用兵
音問阻絕晉錫授經奉母及事平聞父已死間關往訪
比至而父之小妻亦死一弟尙幼晉錫舁兩柩攜其弟
歸母亦視之如己子且命晉錫教之成立

張寅孫字伯玉父拱明遊桂林音耗斷絕寅孫子身行誓
不見父不返至則父已死舁櫬歸與母合葬乾隆四年

旌

朱旂字大占父遂範早卒旂跬步不違母側偶以事入城
則令家童數輩時刻傳報高堂喜愠或稍失和吐哺疾
走足及門醫巫已羅俟矣康熙二十三年中順天舉人
旂戀母不常與計偕甲戌母正色遣之行抵京考授中
書遽歸母卒不勝喪亦卒

潘志道字嗣安少從其婦翁遠賈售輒倍喜周人急施予
無虛日尤憫獄囚歲三賑焉寒則絮之薦之卽遞解寄
獄者悉給錢米性至孝母病目舐之復明邁危疾剖股
食之得愈乾隆年間旌

丁紹美字西文幼孤育於從兄稍長挾與斂租鄉莊紹美
晝隨行夜匿誦讀兄覺之喜聽就學補諸生喜探雒閩
源流體驗而身行之益深於易事從兄如父從兄死二
子業不守紹美以所受脩脯資之未饜時出言資之
如初子起元亦孝友授經里中有大小丁先生之目
劉耿字覲文父早歿家貧母令爲道士己歸省其母母己
三日不食矣耿大慟告其師歸習星卜小技又爲人傭
書自是菽水稍給有大戶憐而字以女會母喪耿廬墓
大戶計女年已長微言之耿拒之堅女尋卒耿亦終身
不娶

黃汝濟字子楫兄汝澄溺死震澤汝濟徒跣湖濱覓尸三
晝夜不得慟哭曰兄乎有靈盍夢我夕夢而旦獲之喪
得歸子趙音康熙四十四年舉鄉試第一成進士入翰
林爲人重名節通籍後家甚貧燕坐讀書不與外事人
稱爲固窮先生

秦源寬字未能生四歲而孤母胡苦節撫之源寬旣成進
士考授中書告歸侍養請旌如制遂與顧培等相地惠
山之麓集貲別建貞節祠奉母主入焉子伯龍進士知
濰縣龍光吳縣學生性至孝早卒

秦枝桂字燕庭父世鑰有孝行枝桂好讀書文行謹飭秦

氏自其先尚書金始編宗譜有名淪者圖繪先人遺像以及碑銘傳記彙爲一集閱數世而枝桂又續加纂輯共六十卷逾二十載而後成嘗自館塾歸適有從弟婦歿罄教授所得爲治後事從弟歿復殯斂之卒歲家徒壁立蕭然自得

呂茂芳母丁生四子而寡嘗邁危疾茂芳屏隱處刲股肉大如掌暈絕久之弟時芳世芳心動燭見之嚙肉合劑以飲母母立愈

成達字民望父英訪母不歸不知死處母吳以節聞達察色聽聲先意承志比歿廬墓久之芝產墓門甘泉出井

兩世純孝能詩者爭歌詠之雍正二年旌

陳人龍字震先十歲喪父事寡母孝少善飲母戒之終身不過三爵母歿年逾九十人龍亦老禁斷酒肉旣禫適館固安主人治盛具瞿然曰禮始食乾肉飲醴耳撤去迺卽席人龍教授生徒多達者年六十四始舉順天又十年雍正五年

特賜進士其歿也弟子華希閔爲作言行略

朱昭時字聲雷父重華好施予昭時以節儉稍致贏餘邑中善舉必悉力爲之以成父志母得危疾露禱願以身代母病竟愈而昭時年止三十九

曹安國字明善父諸生某字穀汝故家子不問家人生產
耽觴詠賓客喧選履綦無虛旬安國典鬻進具產盡繼
以閨匱滌鎗器椀皆躬親之三十年無間父年九十四
孺慕如初安國少多才以病痿廢

浦百齡字永年父鶴翔病劇夜半禱於竈神剖股以進卒
不能治負痛終其身母張年九十六卒百齡已七十二
悲哀不止亦卒先是家困徭役客虎嚙受厚糈弟妹咸
賴之妹之夫涿人也依之五十年庇其家兩世

葛成璟字友宋國子生家本素封里有猾者速其父於獄
逮者至成璟請行糜空解累月父驚懼成疾不起兄謀
假父筆爲析券盡以沃田自予而以礎礪者遺弟家所
侍米廩二穀廩一盡空其米而留穀以待成璟事解歸
痛不得奉父含斂一切並聽兄指無幾微見於言又歲
將闌僂設質庫受敗器而予值以陰惠其地之貧者壽
八十卒

楊大猷字兆偉少攻苦制舉藝而以試射占學籍父纘高
歿教其弟綸大崧若嚴君不別財以專致於學綸大崧
卒以決科名當時大猷保衛先世五百年古墓悉反所
侵地護鴻山泰伯墓尤力

許國蘭國芳開化鄉人嘗隨父樵山中虎嚙其父去國蘭

兄弟爭搯虎脫其父皆傷焉又有周永陞徐世芬秦泳魯袁成學及宋村朱兆裔皆割股愈親疾又顧琮朱輝顧天錫亦皆有孝行

秦實然字涑子貢生道然弟出後叔氏松岱雍正初道然以事繫獄罰鍰數萬實然矢以其身共兄難臺憲不可固請臺憲曰若胡爲於此株不及孥況若出嗣對曰出嗣者分同生者身不株者國恩不移者天性兄存與存兄亡與亡耳卒出私錢代償罰鍰家以貧困年八十九卒

朱生煥字子千諸生其母病篤嘗糞以辨其甜苦里中某好蒲博生煥嘗以事至其家某留飲既坐進食遽陽吐疾走歸懼母之疑與狎也其承志幅躬多類此子琬舉進士

張光宙字若賓諸生雅有文譽事父孝嘗以母不逮存爲痛兄歿撫教其子如己子尙書秦開父也

華世章字漢倬父疽發背世章衣不解帶三閱月父又患目疾黎明世章必就枕舐之乃愈年五十六先其父歿族子希閔志其墓

秦瑞熙字輯五貢生工畫不多作多藏古人書畫精於鑒別寄暢園爲秦氏世業瑞熙獨力新之乾隆十六年

南巡瑞熙進畫冊

賜貂皮瑞熙歿

特頒孝友傳家額並令配享雙孝祠子兆雷蠲常稔田二百畝爲雙孝祠春秋祭享及脩葺山園之費

王進字來益成童時卽以孝聞父病醫言血枯所致進迺頻刺兩臂血和湯藥飼父父疾遂瘳父歿進偕妻移榻母側歷三十年服勤如一日子麟芳亦至孝

雷汝器字若貢國子生父始震學賈以積逋多出走汝器時年九歲泣不止年二十或許字以女謝卻之聞父歷楚豫間遂往尋覓歲率一還家省母輒復出後忽於江

陰旅舍遇父相抱而慟然父終不肯歸汝器迺先馳至家寘酒遍召父所常見負者曰有某在幸毋恩老人皆許諾至日皆來賀是時年二十六後合券凡四十餘次第盡償之汝器故窶人方求父日習爲星卜堪輿之術所贏奇零買小物輒數倍歸而業隆隆起以是得行所願父歸始娶父安養又二十年母病且殆禱於天夢神饋藥飲之愈季父夫婦歿遺一子幼撫如已子

趙楸字禹植父世祿雄於貲生四子楸其仲也分授家產多所推讓世祿以楸賢俾主質庫孟嫉之孟私一奴婦張張鈞守者姦出財庫物匿之私所父覺責楸躡其所

盡獲所亡失張訴于孟孟滋怒陰養兇徒使伺之一日
楸行暗處投以巨木魁中脛脛斷其後拜墓班而跪孟
故屏後猝出銅椎連擊楸折踝折臂世祿老無如何宗
黨置酒令解讐酒方洽孟又猝起刺楸衆錯愕力格之
乃其憤縛孟將詣官寘之法而楸顧遍拜之慟哭爲乞
哀孟至是亦懼而感悔焉

楊綸字象貞由諸生入成均父淵之貴池教諭及歿諸孤
流離家大淪廢綸走四方數載橐稍裕歸迎伯嫂二弟
共炊羣從隨其器能處以常業雍正中累舉方正才能
皆不應

毛士翼字子璵五歲喪母哀動旁人事生計業以起奉父
華甫盡孝養妻賢亦以孝稱士翼宅當鄉田水口舊遇
旱入租當口者家衆乃得水及翼主其口會旱豁其租
且議永除之

華宗轍字子由事兄謹父所遺產悉以讓兄一切公家器
悉後已不先取而力行節儉頗致饒裕以其贏賙卹里
黨人咸稱之

李昌裔字兆玉諸生其先故徽人也昌裔五歲而孤母邵
撫之成立里人侮其單弱避之郡邵念夫墓在錫鬱鬱
成疾昌裔調寢膳數年刻責自奮仍奉母返邑之東亭

服勤慎終備極誠敬家故貧痛母飄飄一生志切褒顯
得請旌迺卒

徐智字鑑若父某有五子產不踰中人智斥妻匭物得金
轉販江淮間贏餘推與兄弟共之兄潮為諸生不嫻生
計智白首恭事潮病羸則匿製參飲和酥酪中連餌之
大起迺已

浦雲字漢章父照病暍神憤雲割肉和藥灌之迺甦妻尤
以節旌在室時亦嘗剜肉療其母時有顧欽明者並以
孝聞

許培元字資蕃家故貧減食養親歲歉困絕竭力營旨替
無缺乏培元夫婦累至斷殮父疾培元以股肉起之繼
患心痛疾刺心血進痛良已父歿終身不食肉不御繒
帛

陳垣字璿衡父霞光性好遊不事生產垣善治家一切不
以干其父霞光因得放浪山水間其友之過霞光者亦
無不盡其歡而去

乾隆庚午
志作震光

楊宗濂字聲毓事母至孝平生未嘗渡江日登高臨深萬
有一危以貽親憂妹適唐得心疾宗濂為置妾生子教
弟大綸有文名官定海知縣

錢朝熙字二愚事父母有至性鄉里皆稱錢孝子與兄袁

英同居終身無私財雖小事必咨而後行兩姊早寡時
賜給之而迎養其無子者兄子中青亦以孝聞父疾顛
禱以身代神示諸夢父疾瘳而中青卒

朱國棟字有懷早喪父母每出耕負耒經父母墓必慟哭
娶婦華三日設祭夫婦相持哭終身以不逮養爲恨

龔煒字清臣性友愛與季弟同居數十年不析箸子德持
亦善體父志無間言侍母疾寒暑不懈

倪體明字黃吉執喪不勝哀旣葬廬墓側或竊其疏布被
去迺編藁爲困寢處其中墓去家可一里其妻紡織相
活或米不足炊則雜馬藍藜苧爲糜餉之一日遇雨徑

滑子失足傾廢體明掘草根和溪水咽之除喪數年而
卒

潘稷字稼先果子果以事下獄稷聞信自家馳六千里省
父職橐餽俄而嘔血死臨絕歎曰脫爰書有急計以此
身代父今畢命臥榻死不瞑矣逾年父獄解檢其篋得
預草代父死疏藁語極酸楚

鄒文然字路若母患蠱百藥罔效文然割股以進且禱於
神願減算益母壽母夢神手撫其頂腫漸消旬日而愈
華希閔字文友希閔弟九歲而孤雍正七年舉人十三年
應聘分校江西鄉試授內閣中書嘗刊邵文莊寶容春

堂集行世其他如脩學宮葺宗祠諸舉悉希閔爲首倡
希閔始喪父時奉遺命事希閔如父希閔自幼以迄成
立凡事必請命於希閔而後行方官京師聞希閔病亟
馳歸遂不出子繼石阡府經歷亦敦倫誼好施予

劉泰父惟裕患風痺手足不仁泰日侍旁著衣傳袴溺器
必親檢母疾革刲股和藥以進母亡號慟嘔血幾絕恐
父知入寢室問安如平常父好施予族黨有困乏者告
其父泰爲鬻田以給之乾隆二十七年有司表其閭

姚夢熊字伯男諸生父球少有異稟善讀書尤精岐黃之
術夢熊負雋才工詩詞以夏月隨父遊惠山舟過蓉湖
大風驟作舟覆父子俱溺夢熊躍而登岸不見父仍躍
入水抱父尸死

周奕清字省源祖宜振進士知錢塘縣民爲建生祠於吳
山父金蘭年七十餘病卒奕清擗踊號慟咯血不止亦
歿卽父卒之一日也乾隆三十八年旌

秦文錦字仲簡諸生能文工書畫少孤兄弟四人仲出後
文錦稍長隨其伯兄雲錦樁柱家事事孀母至孝甘旨
之奉不以貧缺雲錦歿食指日繁不析箸家益困文錦
迺出遊粵東積有贏金歸置田二百畝與其兄子及季
弟均分之而一無所私時有周振亦諸生事繼母孫至

孝教其弟授成進士拱補縣學生

華紹濂字西京少讀書一目十數行下爲文握管立就不加點竄補諸生困於省試竟不遇事寡母至孝母病侍奉湯藥以勞瘁得疾卒其友秦鳴雷爲之傳同時諸生高樂志華聲雷亦高才生而內行淳備皆推紹濂

趙維枚父仁淵年五十始舉維枚性至孝母疾思食鮮蘑菇不得因上惠山頂尋之力倦坐石上旁有白如靈芝者鮮蘑菇也聞者異之母旣歿方議葬適鄰火延及人怪維枚不出火光中見維枚跪棺側號慟言欲與棺俱盡衆憐之迺共冒火舉棺而出嘉慶十二年有司表其

閭

華士俊諸生父曙得疾危甚士俊日夜禱於神願減算益親比歿絕粒臥柩側奄息不起告母浦曰兒不及事母有弟在可無憂屬妻以衰絰斂我不能終三年制畫像亦用初喪服言已長號數聲嘔血而絕同里有錢秉義字翼倫事母以孝行稱亦工詩

黃兆熊字宗文少喪母事父至孝父病足瘡且潰兆熊口吮之而愈旣又患痢飲食轉側晝夜扶持閱數年不少懈子嗣昌亦以孝友著稱錢唐吳錫麒爲作兩孝子傳唐際華國子生幼喪父見父遺衣冠卽慟哭事母孝會修

父瑩與傭同畚築家人至以母疾告冒風雨疾行數十里至家竭誠醫禱母疾瘳而際華以憂瘁咯血不止卒學使旌其閭

華世棟字爾任事後母以孝聞從弟世楨被誣力爲營救屢困而事得雪世楨字元臣少失怙母郭守節壽至九十餘世楨先意承志不少懈族有售宅於世楨者將遷矣夜聞兩嫠婦哭甚哀乃焚券不責值

張元義字心才諸生家貧力學與弟東美同爨五十餘年元義自以館穀不如弟乃曰余兄弟垂老同居能保子孫長合乎盍分爨仲媳憚聞之出見二翁曰媳于歸時父嘗戒曰張氏三世同居若汝去而析產是汝之咎也言畢而泣乃不析箸

王均字安茲少失怙恃兄主家政積逋二萬以三百金遺均曰母累汝均請分任所負嘗暮得遺金寢不安寐質明俟其人還之生平不以爲善名卒之日臨門哭者甚衆

羅孝子世居北里鄰火及其居母病臥孝子持錢券募救母衆見火盛莫敢入孝子奮身赴火中與母俱死

楊作鼎字西京事父母以孝聞兄子章五已孤與作鼎子同時出痘章五症危作鼎謂已年方富尚可育子章五

死兄無後矣乃夜禱於庭願以己子代章五翼日子殤而章五無恙不數年果復生子

周琦字企韓乾隆五十七年舉人際清從子際清兄弟不析產琦服官後自大功以上皆仰給焉祿入不繼歷任當塗光澤知縣多逋負去官日士民醵金代償乃得行幼通曉律令老吏懼服而內行滄至爲時所稱

邵綸錦字香谷九歲割股療母疾年十六父歿哀毀骨立因母多疾治方書精其術兄綸錫出繼伯後盡以父產讓兄已獨奉母會兄產復罄仍仗助之婚嫁其子女母心安焉族祖文莊公祠就圯借顧允旭倡修之諭瑩年久磨滅綸錦蒐訪五載掘地見志銘瑩遂復

過棟字翼廷嘉慶十二年歲祲議圖賑棟以父積誠於乾隆中曾售產助賑遂倡捐全活甚衆始祖宋郡馬墓侵圯過半積誠擬修復未果棟蒐訪十餘載力返侵地而修築之弟金殿諸生嘗割股療父疾析已產予幼弟族有相構訟者賄金殿左袒峻拒之

司馬瑞泰伯鄉人幼失怙恃大母章撫之得成立章老病嚴冬思食鮮魚不可得瑞鑿冰涉河得兩魚以進又嘗割股和藥愈章疾年六十卒次子德章亦以孝著母患心痛斧斫二小指和藥進痛卽止後指漸長如舊云

錢學文字道南父病篤割股以進父更活七載友貧無後及歿鬻已產殮葬之知縣楊潤表其廬

葛煒字又良年十四侍母疾衣不解帶者半載精繪事資以養母及弟偶不給輒減已食不使母弟知爲弟授室弟卒撫其孤寡

劉攀龍字濬川業醫早喪母父聲揚喜奔一日不可輟攀龍延奔者與父奔每食雖典鬻必具甘旨不使父知三十年如一日同時欽浩生懷仁鄉人家貧務農母陸病癱瘓浩生晨夕不離揣其意之所欲母忘疾苦母歿浩生年已六十餘結草棚宿於墓側寒暑無間

瞽者南里人磨粉爲業事母至孝竭力供甘旨年至四十餘眼忽復明

啞兒南里莫宅堯人生而啞幼卽行乞於市以所得錢養母必市酒脯以供人憐其孝皆喜施予之母卒每食必祭祭必伏地號痛旣葬日祭於墓見者皆爲感泣

沈昌錫字硯芸諸生博學工文年十四喪父弱冠卽以館穀養母杜嘗值初冬暴寒冒朔風徒步數十里歸爲母添裘曰母衣單吾不及覓舟耳逾數年母暴亡昌錫首觸牀稜額多傷七日死年二十有八

陶丙吉字勳階諸生八歲失恃繼母性嚴丙吉曲意承順

尤友愛諸弟母亦撫之如已出焉嘗以課徒修脯創惜字會朔望必衣冠將事晚爲族兄弟所累幾罄其產自書一聯云學老子退一步法效張公書百忍圖丙吉病且卒子文揆妻尤已寡有賢行侍疾彌謹丙吉命之曰吾死汝度日良苦不得已日減一餐勿仰面求人也尤志其言終身不丐貸于戚郇撫三子成立以壽終

尤德基字滋庵本生父耿光任宣化知縣疾革德基涕泣叩天籲請身代居喪哀毀宣化士民有尤孝子之稱後治申韓家言厯佐大幕妻顧亦以孝稱嘗割股療庶姑疾

孫希朱字仰晦世居孟里年十二剗臂瘳母疾稍長得朱子小學讀之乃請父更今名以聖人爲必可學一言一動皆法焉雖盛暑不露體雖暗室必危坐雖倉卒無亂步有以道學笑之者曰制外所以養中道學正不必避其名也中歲棄舉業益潛心理學一以朱子爲準的父病食魚致不起遂不食魚母卒不受人賻而假貸營喪葬或問之泣曰希朱平昔無狀然以力所得奉親親享之心稍稍安自是以往有力不能致于吾親雖累千萬奚益今貸諸而次第償焉則吾猶可以自致也旣葬日授徒里中夕廬于墓每獨身手竹杖冥行索塗躑躅危

橋仄徑間雖風雨沮洳弗輟如是三年咸豐初賊踞金陵希朱爲書倡義集餉因得鉅款濟師六年歲大旱邑令敦請禱雨跪誦孝經于赤日中得應同治中旌所著書凡三十餘卷弟子薛鎰篤行士也爲刻而傳之

許鵬遠字岫瞻母周瞽且痺扶持調護一切皆鵬遠任之不敢一日離授徒得館穀悉以供母年四十不娶人勸之鵬遠曰吾兩兄皆有子何汲汲爲咸豐十年粵賊犯境奉母居湖濱之南津母命諸子無聚處曰聚則殲焉散則或有存者故惟鵬遠留侍母賊至縱火鵬遠登樓負母不能出同焚死事定出其燼骨猶負母不釋手云

周弁鎮新安鄉人父疾篤刲臂療之越數年而卒事母彌謹過神廟輒入拜若有所禱人間之曰願減己算以益親也吾父早卒者未預計及耳後母壽登耄耋而弁鎮未五十歿母常涕泣述於人

張大銓早喪母經亂失業而父取攜無闕一日中膳已具父市魚肉歸婦將留作來日供大銓知之怒曰吾父非不知艱偶市此必興有所屬奈何拂之命烹以出父歿逾年哀毀成疾卒

榮光世字詠叔光緒二年進士授工部主事觀政數月謁假省母吏謂以措資請可紓期限光世曰吾誠欲歸省

耳甫入仕卽欺君耶卒不易光世少孤奉母盡孝事織
悉必白於兄而行體羸善病歸數年遂卒

附

管近德陸士進皆涇里華氏僕也奉母皆盡孝近德妻事
姑少不謹輒懲之母病且死稽顙北辰自宵達旦母死
復甦士進兄弟四人並以孝友稱而士進割股療母疾
孝尤摯

繆季少失父母有三兄弗恤亡去爲仕者僕三十年辭歸
居里屋舍盡改兄盡死遺一嫂傭於人一從子已爲僧
季訪得之迎嫂歸爲從子娶婦置田宅家賴以復完

無錫金匱縣志卷二十四終

無錫金匱縣志卷二十五

行義

邑中特立獨行之士如明初張翼徐績輩義聲震於遐邇跡其行誼殆范史所稱操尚都絕者矣若夫為善於鄉好行其德其人大率優柔平中不必有嶮絕奇特之行然自流俗既衰乾餽且有失德士大夫果能不以封殖自私鄉里緩急足恃君子有取焉志行義第二十七

宋

沈樛字斯年性醇厚樂善家饒於貲人貸之或不償即折券無靳色歉歲傾廩賑恤嘗以萬緡助軍興朝廷欲官

無錫金匱縣志卷之二十五
之不願賜號達義處士

李綸字季言綱弟當建炎元年八月叛軍來寇將及境邑無城戰守皆缺綸與知縣郝漸定謀出與寇約俾受犒去邑賴以全

元

強以德字振之二歲而孤弱冠學成授采石書院山長歷儒學提舉以母老棄官歸構義學延師以教鄉里子弟捐田千畝贍之又買璨山地四頃以葬邑之死而無歸者朝廷表其門曰善義同時華玠官長安織局提舉亦好施予有義聲

明

張翼字飛卿長七尺頰頰而髯讀書尚氣節雖時貴人言不循理必面折之張士誠陷無錫盜販之徒首纏絳帕執戈矛巡門嘯呼民恐旦暮屠戮翼不為動徐達破姑蘇遣胡廷瑞率師攻無錫僞吳將莫天祐固守達命使諭降天祐殺之達怒檄廷瑞曰卽不下屠其城於是翼與儒士徐績徐續往見天祐曰西吳兵亟矣將軍計安出天祐曰吾受主厚恩誓以死報翼曰將軍固守爲張氏也今張氏已就縛矣又將誰爲胡平章舉十萬之師壓境生民之命懸於將軍翻然改圖則上不失名位而

下免數十萬眾於荼毒將軍豈無意乎天祐沈思久之
擲帽於地曰誠如君言吾不惜屈己事西朝顧如失信
何翼請往議以報乃縋城下見廷瑞廷瑞許之約三日
率妻子來降翼歸報天祐自縛詣軍門廷瑞乃入城不
戮一人市肆安堵如故錫民德之至今績字伯凝績字
仲祥三人既以說降天祐有名於時洪武三年並舉經
明行修將召用而績故嘗爲僧至是竟逃去不知所終
翼亦以老辭不起惟績應命爲武岡知州進順德知府
太祖嘉其始終一節賜璽書褒美歸老於家卒年九十
有七初張士誠聞績賢欲用之不往入明乃委贄焉時
又有火丹赤者邑人周思文養子思文以先世爲哈麻
火契丹達魯花赤俘其家故名子以識志翼等之說天
祐也思文率父老而從之丹赤進曰周氏宗祀惟大人
在大人不可往請代大人行及天祐降其麾下兵猶不
卽進丹赤趣之則怒曰爾欲誘殺我乎遂殺之天祐至
金陵亦磔死後翼子籌策皆貴顯

李元丑字逸季有勇力讀書擊劍多俠遊元至正中羣雄
競起元丑謂天子氣在淮泗間乃渡江求主得明太祖
從焉平張士誠有功將官之遽卒詔賜斗門田以贍其
子李氏遂世著於斗門

談綽字公綽性質直洪武中以人材徵奉命督賦蘇州知府李某以百金餽不受嘗客松江同舍郎夜置酒召妓而迫狎之綽明燈端坐達旦妓感泣遂改行爲良家

姚樞字景衡貢生授某府推官與張文煥善文煥死寇難其妻邵以子元保屬樞遂自殺樞攜元保至京師節衣食養之元保又天乃訪文煥骨於野寺負之以歸并元保葬之

楊宗昌朱待用皆邑老儒蘇州知府姚善先後延之於家教其子節善被戮節戍遠邊二人間關徒步護節以行皆死道中人稱爲雙義

苗有年字足國力耕自給永樂三年歲饑民多死有司勸賑富室莫應時有年家有米十二斛捐其十以散之鄰里僅存其二乃取草根樹皮雜米食之是秋大疫苗氏獨免

顧信字元孚祖福五父壽皆尙義明初有強黨俞寘者縱橫膠山鄉嘯聚劫掠福五及壽倡集義旅捍禦里倚以全寘乃竄入京搆蜚語陷福五逮繫獄壽伏闕訟寘寘伏法福五得釋歸永樂時詔旌其門曰雙義信少孤貧寄食於其姻邵氏家嘗早起立門外見富人鄒雲偕僕騎而入城僕下馬攜笥如溷頃之馳去忘取笥笥中裝

值千金信立俟其來還之鄒聞馳謝分十一以贈不受適蘇商某泊舟見其事而義之要以行厚託焉且妻以女後乃漸昌尚書可學副使可久之祖也

華興叔字仲諄悰韓子勤力田鄉人化之無惰農達生而好施嘗因事被誣構而與其人同繫獄興叔推誠相對無幾微芥帶病爲具醫藥撫視甚周其人愧悔曰吾小人迺大獲戾於長者事卒得釋孫禎字守吉宏治中出粟賑饑例得旌門禎請移旌祖墓邵文莊寶爲作旌義墓門銘

錢清字孟清慕婁師德爲人自號景婁家富族黨待舉火者數百家正統五年饑捐二千石穀佐賑景泰五年饑復捐三千石朝廷欲官之不就授其二子俱承事郎時有侯清者亦字孟清富而好施邑有義舉得清迺辨時人爲之語曰困欲拯乞二清

錢秉字公治以字行家世好禮秉尤好讀書正統六年饑與從姪惟常出粟千石以賑有司以惟常名聞於朝賜敕獎諭焉

趙瑾字公韞景泰六年饑疫死者皆棄於野瑾買棺置衢路縱取無所問有鬻田者匿其左券以構訟而遺其券於道旁瑾所畜犬遽銜至瑾前匿券者詣瑾謝罪瑾曰

本未嘗有券也人以是益義之

華燭字文熙父守方遺財巨萬燭無他好惟以散財爲樂凡助邊賑饑下及捐衣施藥其門如市一日人眾空其一倉則大樂產盡而後已兵部郎鑰之祖也

殷廣成序孫歲薦饑出粟千石以賑貧民者三遼左軍興傾家貲助餉詔賜七品秩不受

成昌字彥文以醫自養而樂施濟嘗有老嫗詣門求醫置鈔數緡忘持去昌追還之年踰五十始舉子卽僉事始終也

朱南仲前漳里人以書獄爲縣吏景泰末歲大饑饑民強貸於富室富室指爲盜訴之官知府當以大辟南仲持不可官怒屢榜掠之不易辭獄因久不決明年天順改元大赦獄乃解獲免者三十六人

華芝字楚英性謹厚巡撫周忱舉爲萬石長成化十八年饑出穀二千石賑貧民有司以聞錫冠帶獎之

楊旻字日初讀書好客居迴溪里歲積粟萬鍾與里人共之歎散豐收不以時高下其價歲饑嘗應詔捐千石以賑授冠帶孫淮見忠節傳

華賢字人表任俠尙氣節武宗時劉瑾專政賢詣闕疏陳瑾罪罹詔獄邵文莊寶力救之得免

安國字民泰其先黃姓蘇州懸珠里人洪武中有茂者贅於安因從其姓國性警敏多遠畧以貲雄於時贍宗黨惠鄉里乃至備倭寇濬白茅河諸大役國皆有力焉父喪會葬者五千人所居膠山數里無水會歲饑大出粟課民鑿渠日集千夫自春及夏成巨浸民賴以活石田轉爲沃壤而其圃亦成所謂西林也

鄒望字國表父翎指揮使望才局機敏愛人禮士好施予凡貧者來告無不得所欲而去

華麟祥字時正由諸生入監選浙江布政司都事不赴轉輸播殖遂雄於貲歲饑粟貴傾廩賑貸無弗應者新會

陳獻章爲顏其堂曰樂善令子雲受業於邵寶寶歸田後與富室相款曲者惟麟祥一人

華瑛字汝德以貢授大官署丞稱疾歸亦善生殖好爲德於鄉里受其澤者每元朔扶攜叩首滿戶庭瑛無德色有反噬者搆大獄誣瑛既而其人坐發冢論戍間逃還瑛勞苦飲食之歡如平生善別法書名畫一時鑒古之名亞於長洲沈周

張獻可字廷諫家貧爲塾師子選貴無驕色及選廷杖歸獻可怡然曰死諫職也既老命選施義棺畫圈三千於紙每施一棺則記日月於圈之一日盡此則續之復募

掩露骸先後無算武進唐順之志其墓選見忠節傳

鄒鈺字履坦家僅中貲而喜施予以糧長領區賦代窮民

償者無算嘉靖四年歲饑盡出家財以賑

鄒夢桂字汝丹嘉靖二十二年舉人少孤發憤能自立不

與俗浮沈家所遺田悉推其弟娶妻奩具美固卻不受

一時鄉舉者有蔡瀛殷旦祝舜齡皆有志節見稱於時

張守經字子傳翼族孫善射任俠嘉靖二十三年夏倭至

焚掠遠近死者相藉守經傾其家貲募集鄉勇延教師

何五路為之督而奉諸生苗子白為謀主子白及何五

路等三百餘人與賊戰斬其酋閻三等數人既而敗五

路及其徒三十五人死焉倭亦氣奪遁去守經為監司

檄取從征屢有摧敗將論功以母老辭歸

按王其勤修城在嘉靖三十三年甲寅城成而寇至何五路等死焉即其時也考諸王其勤修城記及高忠憲王侯兩廡記王永積王侯祠記皆合而前志此傳則云三十五年丙辰其誤始於梁溪雜事而識小錄因之錫金志外遂謂王公築城與義士死事非一時事一在三十三年一在三十五年今攷識小錄云倭寇蹂躪江南四月及錫知縣王其勤始築城五月八日苗子白等與戰於西郊死者何五路等三十六人則亦未嘗不以為一時事特偶誤三十三年為三十五年耳又攷明史橐日本傳三十三年正月自太倉掠蘇州四月復薄蘇州蓋即吾邑築城禦寇時也三十四年復掠蘇州延及江陰無錫至三十五年倭擾之處與無錫遠不相涉而高忠憲之記亦云甲寅乙卯間吾邑有倭寇而不及三十五年則吾邑是年實無寇患益可證梁溪雜事之誤矣

薛旦字子明雄於貲嘉靖中知縣王其勤築城禦倭旦先

輸金助役西南隅缺十二旦借弟灝景罄貲竣之灝字
子大亦慷慨有氣節嘗以諸生爲糧長時政煩賦劇民
不堪命灝糾賦役諸弊上書當道得請邑人便之

施方昇字仲光諸生慷慨好義重然諾其友有華兆登者
姊適強以虐死兆登訟於官而直之強以是讐兆登必
報焉亡何家有喪事華之少長畢會而族人某者以攘
義田租爲眾所疾遂羣擊之喪所而死強因厚資其家
使力主兆登誣服繫獄方昇命其子元徽曰善人在患
饑不及餐況父友耶子必勉之元徽每左右兆登不能
脫久之朝命使者恤刑江南元徽宛轉營救得釋歸兆

登武進孫慎行門人多著述尤深於易

張淇字子期學行清介顧憲成師也憲成擢吏部郎徒步
往辭喜曰此真吾弟子非天官郎也以貢歷官吳縣休
寧訓導未嘗於達官貴人前一齒及門弟子姓名一日
賦詩曰靜中自念常憂國夢裏思親輒過家遠拂衣歸
饋粥不給晏如也

吳元長厚好施邑水災民多溺死收瘞遺骨凡千餘養濟
院頽壞見諸瞽者凍露風雪中卽盡築而新之設粥施
樽頻歲不倦知府趙兌旌之曰尙義

元後居武進

許伊字文山性介特陳以忠知光州延教其子光州名士

多與之游有余繼善者尤相契厚後余成進士司理常州累招不往有里人爲盜所誣余知其枉謂曰汝能致許先生一來吾脫汝矣伊乃詣郡白之里人餽謝不受倪瑄字良玉力作起家兩弟皆早世諸治辦先兩家而後已萬曆十六年饑出粟千石備賑仍爲糜飼其里人邑當編役身任之脫諸貧民邑長加禮則曰往役庶人分也恭而不伐人尤難之

華祖勤字汝成萬曆二十二年舉人博學負才氣有武弁持千金求屬事於其姻婭之在要路者卒謝不可屢躋禮部試天啟中居京師逆璫亂政迺拂衣歸子潤球有

文行官高州衛經歷

陳正卿字並漁幼學子萬曆四十三年舉人遊高攀龍之門受易於錢一本所交惟馬世奇一人疾惡甚故寡與有田不過數畝僅供飭粥值歲饑指其餘粒語家人曰吾欲出此瞻桑梓則不給欲獨食義不忍奈何因日噉三棗遞減一棗八日而餓死子禋祉順治十五年進士臨安推官嘗籲巡撫題豁三邑荒糧六千五百石有奇季衍昌字如舜少以誠信推於其鄉有西村孫氏者故素封與談濟有隙濟子死誣孫殺之訟於府將檢視而濟妻不忍其子之析骨也使濟夜叩衍昌門曰吾始意不

至此誠以君之言俾少資我可告息也於是議以百五十金爲濟養及葬其子費事已濟至衍昌所受金因留三之一以報衍昌衍昌緘膝識歲月穴置之牀下後五年遇濟於城南望見衍昌而趨衍昌呼止之問無恙曰向之所得旋爲族人分攫蕩盡今羈棲呂城且不能歸故土何面目復見丈人衍昌邀至家謂曰若但改行吾爲爾資遂出所藏畀之濟猶識故物也頓首愧歎受金而去又里人盜衍昌粟事發其人反訐於官累訟得實將發驛衍昌度歲饑久繫今遠遣萬一道死是吾以數石米殺之也爲宛轉解釋竟得不罪

顧三達字行甫詵孫以長厚稱鄉里崇禎中歲大饑倡義平糶遂半其直忌之者如其價求米二百石立與之孫秉禾字秉兮源文子重然諾有智數好急人之難當所欲言雖貴豪不屈而未嘗忽一婦豎族黨服其公正是非多取質焉

樂韶字振之諸生鼎革後居家教授爲邑碩師家故貧父所遺產悉讓其兄友人倪康侯饒於財因鄉多盜昇數困寄韶家曰此粟置君所倘不給任所取用韶檢視皆金帛也亟手封識事定後悉歸之邑有被誣陷重辟者適司理爲韶故人密白其寃得釋其人德韶持五百金

爲壽韶笑謝不受子莘政皆諸生莘嘗割股愈母疾
周在燦字用協諸生內行醕備華允誠以不薙髮被逮戚
黨皆竄匿在燦獨詣舟勉厲且出贖金爲別邏卒欲併
執之笑曰死且不避豈畏禍者耶允誠顧卒曰自今無
復有餽贖者矣乃解其業師某歿家有四喪悉代葬之

附

迺安者華仲儀僕仲儀戍淮久貲盡自分無所得食則死
安因求事乾沒日以所得歸給其主必有餅餌脯鮓而
後卽安其後有王朋者亦秦塘涇華氏傭主爲郡諸生
而擊殺其族人之僕舉家倉皇不知所出朋徑詣官言
主有事郡學去邑百里殺人者朋也歷訊任益力遂具
爰書死獄中又李松者龔錫爵僕錫爵父暴卒有利其
貲者謀賊殺其孤而取之松知之乘夜冒雪負孤而奔
金沙村得免後輔其主勤苦二十餘年至錫爵登進士
官工部郎松乃死又姚祿者從其主姚期綱運入都期
罹法東廠捕之亟期出祿守舍遂自言期子縛之去道
遇期亂以他語期乃逸祿至官榜掠甚酷堅言父逃事
久得解歸又梅受周鹿遊僕鹿遊居菰川妻死貧甚獨
養於受鹿遊與鄰張道人爲至交受并養之受嘗凍餓
無怨悔垂三十年而死

許達馬忠肅世奇僕世奇殉節時達請從死世奇曰汝死誰歸吾櫬達受命扶櫬歸既葬大書於墓旁石曰身還父母歸黃土魂隨恩主上青天自經墓樹馬氏葬之惠山天妃宮後李士芳者其姊爲世奇妾從殉難者也初士芳伴幼主丙玉讀見史記程嬰公孫杵臼事問曰彼二人固趙氏僕乎何以謂之客師曰因其義也士芳曰吾他日亦可爲馬氏之客乎師大奇之甲申之變士芳走投御河橋下死年僅十五

國朝

楊墀字覲黼諸生廉謹而好施歲饑常貸粟以賑邑有大役爲食於路以餉役夫或負官逋而鬻其養女墀詢知其舊族也爲代償賦而歸女於其本生邑趙生才而天婦苦節鬻田以葬墀命諸子反田折券子泓進士官行人

華汝脩字履祺諸生父國球敦行孝弟教授鄉里汝脩事父能養志建祖祠率宗人遵朱子家禮卹貧乏贍孤寡施構掩骼諸善舉甚多嘗見有逋糧械繫者爲納逋而釋之

丁明俊字樹滋父命析產悉推與寡嫂獨身治生有贏餘以什之二與其孤甥而已更與兄子中分之有大帥鎮

蘇撤回兵繹騷明俊獨延其伍長厚飲食之令戢眾由是兵過南塘無譁者

丁華祖字熙之少孤服賈養母嘗客武昌心動亟歸抵家母果寢疾鼎革初鄉多盜華祖詣軍門上方畧卒用其計殲盜歲饑捐粟助賑子允祉以歲貢任潛山教諭能得士心

楊紹雍字鴻森諸生性醇厚負經世才有大事上官倚以條畫邑中善舉常恃之主辦所建造修舉爲鄉黨利賴者人得一事足以爲名而紹雍自視若不足子銘敦知湯陰縣在官所需悉輸給之銘敦見宦望傳

鄒溶字可遠以字行世貴盛豪於文酒嘗北遊主滿洲法葆家法葆善書畫鼓琴以事亡命吳楚間時與溶不相聞數年矣溶飲於外間有急客歸視則葆也舍之山中數日逮者至先逮溶因獲葆械至京繫獄葆伏法溶亦論斬所親爲斂資治後事溶顧吟詩豪飲醉卽酣卧如平時獄上命監繫在繫五年讀書不輟喜畫山水學吳仲圭初不自名至是購者無虛日旣減等流關中士大夫皆待以上客又十年遇赦歸家早破寄食僧寮以死溶友朱瀾字幼安以友人獲罪牽連死詔獄瀾嘗客遊燕趙齊楚間多懷人弔古之作宜興陳其年序其詩子

元方於父被逮時徒步隨侍入都稱孝子

倪永建字建侯貢生 國初時嘗走閩浙贖回被掠婦女

數十家歲暮入城見負逋繫械者輒代完賦稅歲凶出

粟助賑設粥廠施棺藥治橋梁靡不竭力輯古今善惡

事為法戒錄勸世

孫洵佳字蘭堦諸生倜儻負才氣三佐賑濟條上方畧皆

施行康熙十九年大水巡撫慕天顏議以工代賑洵佳

請築芙蓉圩埧岸七十里巡撫即委洵佳一月而成武

進江陰咸利賴之其議編審法不可罷最愷切又議革

除經催催一亩十甲本年糧餉議停丈量蘆洲議門稅

勿加耗而免孤寡之稅時吳興祚為縣官深倚信洵佳

洵佳於邑利病事亦知無不言

顧敦字子仁諸生以恩貢授知縣不就嘗捐貲築塘自三

里橋至石塘灣計二十餘里性坦厚所欲施不問多寡

子憺字珏斯以友愛稱庶弟于重法傾貲營救得解既

諸庶弟盡破其產則割己產給之憺子建元尤好施予

赴義若渴遇歲祲賑貧乏無所遜即兵備道光旭父也

楊思九字維三少貧勤於力田穀稍餘輒別貯之大署其

廩曰賑謂異日施濟當用是會歲饑邑紳詣鄉勸賑諸

富家皆辭以他事因共過思九思九即踴躍曰計吾家

所食餘悉以賑諸富室聞之迺更出粟子宏度篤實醕行亦如其父

杜芳字韡仙父禹謨尚義喜恤貧弱芳初貿易江湖間得百金則輟其半為從弟婚復貿易得百金則以嫁從妹葬族中五棺既而業隆起見饑寒者輒衣食之歲暮袖銀錢數十函走街市見皇皇然無以卒歲者遺一函道旁使之拾去初自韜晦久漸有聞索施者盈門芳弗倦亦無濫與者芳八十九歲卒子詔見文苑傳

秦松期字邳仙以貢授蒙城縣訓導不就改翰林院孔目家居養親內行淳至負才識不及施用間試之鄉里臨事犖犖難惑以非邑有公事松期恆尸之急難排解或以此叢謗弗悔也

陶天璧字恢旃本錢氏其先贅於陶因蒙陶姓天璧少孤貧祖墓濱太湖迷失塋域訪求積年始得其處既長家稍裕性好施濟會江陰水災沙民多飢溺即倡里人齎粟載櫬往拯之慷慨切直常面折人過退無後言子布政使正中

秦公錡字二酉初嗣叔父後叔舉子即盡還叔產固與之受瘠田二畝種秫以釀酒架上卷帙縱橫覆之皆成誦亦時用為酒資曰書在吾腹中無事此冊子矣居沙頭

面湖環山陵谷窳篠經歲不見客嘗至虞山居海濱聽潮聲三年不歸家人莫知所在老值歲饑家既貧無子又恥從人求食走入湖中死

錢袁英字蘭宜父棟卒時以節性慎言積德三箴授英英因更字箴三居負北郭市囂鼎沸英鍵戶讀書教授弟子門無雜賓產不踰中人而勇於爲善不以力詘辭少寄籍婁縣爲諸生以貢授青陽教諭未任卒

陶乾字元直性慷慨敦氣誼陰濟人急不尸其功母祝苦節乾服賈以養未嘗失歡其後有竇文銘字茂如亦以賈起家好善喜施有楚商攜藥材求售千金者文銘審其僞能殺人于之值而焚之孫廷棟諸生官兗州通判有友爲福建知縣以虧帑被逮廷棟傾貲贖之歸

過人秀字惠民夫婦操作習勤自給旣而業漸起慨然慕范文正之遺風先置田百畝贍族之孤寡老疾者復延師課族子弟將卒命其子能成曰若必成吾志能成積累垂及千畝遽病卒遺訓曰義田不成祖父目不瞑其子廷棟卒成之

范章采字施五諸生章采兩妹孀而貧并諸甥養之於家吳培源少孤露章采撫而教之後成進士

蔡鶴齡字穉仙居延祥鄉之西地高仰小旱輒絕流鶴齡

出貲開濬二十餘里桔槔無阻鄉里賴焉梅村泰伯廟
圯鶴齡獨葺之捐田四十畝爲修繕費復請於有司復
其稅其族有家椿者字楚材性坦率勇於爲善家事付
諸子日索錢懷之以與飢寒者歛窮故人惟恐其去家
眾雖頗有後言不顧也

虞龍祥字子定貢生父明元以歲祲籲賑激怒當事禍且
不測龍祥走告有司爲剖晰民生利害竟得白而釋其
父

范君瑗字蘧若諸生慷慨好義歲饑君瑗先出粟給鄰里
令俟官賑官賑畢復出粟續焉里人因忿爭自刎其腹
君瑗往急召醫治之得愈種德施惠久而不倦

程錦字斐兮少孤節儉起家撫其姪授產如己子姪屢破
其產復振給之嘗獨修建嚴球橋人不病涉又有華昌
社華元錫龔益深陳世傑趙鴻基皆敦厚好施而益深
能養其姪婦之孀者至於三代尤人所難

鄒文錦字煥章國子生居邑之蓉湖尖豐於財而急於義
睦嫻任卹而外如廟宇寺觀橋梁道路以損壞告必極
力營治之鄉里稱善人幼子思成諸生亦能承父志
華進思字聲求世居蕩口以勤儉累積致豐裕獨置義田
一千三百畝贍族當事爲請於 朝授休寧縣丞卒喪

歸其族男女老幼號哭拜迎皆曰聲求活我子公弼字
聖培承父志移建義莊於所居之右其後人遵循施設
條理秩然一本進思遺法

周文哲國子生邑之南鄉人尙義好施遇歲祲疫癘必多
方賑卹其鄉里以是漸罄其貲不惜也知縣程光瑄將
聞於大府旌其行堅辭之稍後有周宗琳居開化鄉慷
慨負氣嘗泛海遭颶風冒險拯鄰舟於難弟某溺海死
宗琳親詣海濱求弟尸御其匱還子鎬見宦望傳

宣秉文字省宇業賈有信行客有以豆千石屬秉文售而
去者秉文爲售之得千餘金客久不至乃密與僕周埋
之室中閱十數年秉文歿客子始至周發所埋金還之
曰今日主人心得白矣

張鵬翔字萬景世居蓉湖尖乾隆五十年饑明年春大疫
貧病者枕藉於道鵬翔處以空室至數百人予之食及
藥鵬翔故知醫多所全活家產爲之罄遂爲甯人族兄
雲汾字玉川亦好施予

過鳴岡字正鏢家故有貲喜賓客工詩文初遊京師以文
謁尙書任蘭枝或戲之曰長袖善舞鳴岡怒遂歸買楊
氏園於管社山林壑幽勝奉二親居之邑城北普濟堂
鳴岡獨力成之家遂落子仁字味勤撫兄弟子如子至

老不析箸嘉慶十九年歲饑出粟助賑鄉里德之

鄒宗周字希濂從父士元歿於江甯遺孤岳才數齡挈歸教養孫汝瑗字體蘧性鯁直與族立條約經理祠墓代納逋糧年近八旬卒

安泉字鳳林少讀書既長習醫就醫者屢滿戶外遇貧乏則徒步攜藥往治不責報數十年不倦拓其廬曰飛香圃種植花藥貯古書鼎彝翰墨於其中子恩桂與弟宮桂析產以讓稱恩桂子詩見文苑傳

嚴文珍字寶齋有姊適馬無嗣密貽千金產文珍爲之立嗣盡還其蓄乾隆五十年邑大疫子慶餘將構新室稱觴文珍不許慶餘因以所購室材就里廟倡施棺木慶餘嘗收債既焚券矣察其色哀仍與之遇寒士將沈淵贈以貲得生父子濟窮賑乏多類是

秦鴻甲字肇中乾隆四十五年舉人性淡於榮利家人勸其謁選中途遇浙人梁某舊友也以州縣虧空被追鴻甲遽解千金橐付之歸乃不復仕年七十四卒

安汝諧字聖和貢生奉父遺命建置贍族田千畝嘉慶二十二年捐貲修葺學宮邑有善舉無不仗助年九十二卒閣學朱方增爲之傳

薛景達字孔傳欲置義田未成臨歿勸其五子四子相繼

卒季子雲從集諸兄子設義田千畝里西有白沙圩橋將圯雲從獨力建石梁嘉慶十九年大旱捐貲助賑

侯鈺字仁宇國子生可儀兄子少失怙一動作必咨於母鈺節縮衣食臨歿以千金產設義莊置田三百畝贍族焉兄軒字振西汾陽縣典史亦友愛無間

過龍桂字子蟾父裕光母孫俱早歿事繼母陳終身孺慕從弟二人失怙恃族子某以盲廢龍桂撫而長之咸得成立母黨妻黨若干人婚喪衣食皆仗助之嘉慶中助賑者再子賓宏皆好善兄弟友愛數十年不析箸

須宗周字兆璜國子生嘗割股療父疾以孝行旌從兄大炳卒挈其妻子同居子又卒撫其孤孫置義田千畝新文廟成橋梁屢捐助賑前後共費五萬有奇子錦中亦割股療母疾好善如其父

孫保之字惠時忼爽有識勇於爲義嘉慶十九年亢旱知縣韓履寵延入賑局保之首捐三千緡爲倡邑紳富皆竭力樂輸是歲捐數錫金甲江左保之悉心經畫凡七閱月年六十一卒

錢耘仁字性香好施予嘗集同善會以資里中之憊獨者三十年無間能詩著有貧樂居詩彙

嚴昭字公觀捐田四百畝並勸同族捐田百畝以贍族嘉

無錫金匱縣志 卷二十一
慶十九年董賑務竭力倡捐道光十三年歲災亦如之
浦曰璞字席珍性孝友樂善好施親族之無告者調之不
倦里中施衣施糶掩骼修塚諸善舉無不與嘉慶十九
年捐貲助賑

錢雲龍字際會國子生好周急年過八十以娛老田二百
畝授其次子楚南欲增置以資贍族楚南出己產並集
諸昆季以成父志又置田十六畝供祭祀之費

嚴仞千字鳳翔以孤貧起家有善舉必勉力嘉慶十二年
歲饑捐貲助賑鄰里以至十九年旱率先爲倡道光三
年流民至復盡力伙助人皆效之全活甚眾

秦瑤字丹麓家饒於貲少因病精醫嘉慶末大疫人相仆
於道瑤治之輒起自是有名富貴人招恆謝不往獨喜
視貧人疾或并給以藥及錢米居近嵩鴻諸山山麓厝
棺相望值歉歲出金召人掩埋人賴以贍而數十里無
暴骨道光中佐賑者三費六七千緡江陰壽興沙湖患
漂溺人瑤病中聞之以四千緡畀人拯救其好善如此
孫桓字公執父治嘗捐田課族子弟桓又出千金及諸從
弟營建塾舍以承先志居喪三年不入內寢性儉約歲
稔旣佐賑益自貶食曰人方無食忍獨豐耶或攜錢過
窮巷不徑給陰置其所而去嘗遊浙中館人肱其囊金

或搜得以白桓桓曰此非吾物也笑卻之

竇承焯字俊三貢生能任事嘗於恆善堂增設保墓遞解船又集灑埽會爲學宮歲修費邑有大役若水旱議賑修圩岸葺橋梁一切倚辦鄒壯節鳴鶴倡革現年總甲廣書院膏火承焯皆力贊之咸豐十年襄辦團練死難顧灝字影恬富而好善道光中累以水災力佐賑務嘗捐八千緡於恆善堂二千緡於東林書院祀東林報功祠子璞於吳塘門倡建救生局長興縣俗多溺女乃往助建保嬰堂道光咸豐間助賑助餉璞皆有力焉

陶雨田字秀莊以賈起家建祖祠置義田嘉慶道光間水旱助賑尤力子承侃副貢生知黃縣

華廷黻字蓉溪諸生能書畫道光二十年大水廷黻以官賑不能徧而或以食賑爲恥乃與余治議設粥店減價賣又擔粥就之全活無算後遇旱潦皆如之

余治字蓮村諸生以勸善爲己任每謁當道及諸富室畫卹災保嬰等事多得行江陰長興沙有劇盜王錦標咸豐四年大府密札福山總兵將往勦以治習沙民檄令先往治至集眾諭以禍福皆聽命共縛錦標餘黨悉解治晚年益廣刊善書或集優人俾演古今果報事冀感發鄉愚一時有余善人之目嘗病劇其僕陸慶斷一指

療之既愈數年而卒

錢萼字逸樓諸生治小學以長厚稱於鄉里六世同居無間言咸豐十年邑城失守各鄉集團萼有同里十七人以避賊匪山谷間邏者得之疑爲賊諜將戮矣萼聞亟往白其寃而脫之

嚴湘字楚望世居寨門湘贅於膠山朱氏遂家焉善治生家日起而諸弟漸貧乃迎母及弟同居慷慨好施多賴以濟

徐對揚字少山貢生選嘉定教諭未赴邑有災祲捐賑不遺餘力嘗偕蘇州許某創建恆善堂又以南望亭橋水路以通纜復浚支河以便繞道自是往來無覆弱患

汪海平字春荏者治小學從同里張步瀛長洲陳奐游咸豐十年邑城失守海平居安鎮集團與賊相持數月團潰乃走上海上書巡撫李鴻章慷慨言事及收復邑城奉檄辦撫郵事尋卒

倪景堯陡門人母疾露禱於天母素持齋及卒景堯亦終身不茹葷道光二十九年大水盡鬻其田數十畝以煮粥賑飢於宅旁建保嬰堂並設義塾遭亂居上海亦募捐煮粥以食難民並給木棉紡具俾自謀生邑人余治

孫元楷欲白當事請獎辭不受

附

張義張鞏先僕鞏先父為里正負積逋每遇追比義輒代受笞笞畢歸未嘗愆期亦無怨言鞏先妻死子接三幼義及其妻哺育之義死益貧其妻卒撫接三至於成立又烏子者顧分孟僕也分孟死寡妻幼子無所倚恃烏子傭工養之無缺乏

耆碩

五帝憲三王乞言憲法也主法其德行乞言求其善言也又曰食三老五更於太學蓋天子視學設三老五更及羣老席位執醬親饋執爵親酌是也漢永平二年三老李躬五更桓榮皆以齒年賜爵祿嗚呼盛矣邑中耆碩遠者無可考今次自明以下得若干人雖非必安車束帛盡有如漢代稽古之榮而黃髮遺耆類以厚德懿行著於鄉黨不獨尚年尊齒而已志耆碩第二十八

明

周理字彥復與兄文及弟衡拳同居講學互相授受文等

皆仕理教授於鄉里以高壽終

侯文淵字怡晚敦龐朴茂表率鄉里時稱之曰侯善人孝宗初恩授八品秩子清見行義傳

盛昂字文珪行鹽於粵父喪訃至鹽直千金未入棄之遽歸曰營利以養親也親亡安用利爲喜卹貧乏不念舊怨子卽都御史顛也

談復字采芝以醫藥濟人衣食常不給而所得悉施貧者子經綱皆貴復亦高壽

秦樸字物初長身古貌博學有文章嘗與同邑翟厚諸人爲真率會不求聞達而衣冠文物表率鄉里號抱拙生年九十三卒孫霖字卑牧雅有祖風卽尙書金之父

茹海字德寬精岐黃術選隸御藥院二十年起人濟困無算好施與雖妻孥飢寒不念子鳴玉鳴鳳鳴金皆貴顯海年八十餘訓子孫勉行訥言莆田林俊私謚爲端簡先生

侯應昌字希紹諸生祖德子性坦率有故人竊鬻其田若干畝應昌往還如故不以介意子先春官給事中時嘗奉敕閱遼左則書誠曰遼左產藁貂倘以老人故攜一貂片藁入山海關者非吾子也晚構數椽中畜二鶴朝放暮還顏其處曰環溪深隱以壽終

顧道潔字嗣白諸生喜爲詩古文年甫艾輒謝科舉屏居南邗別墅與從弟洽相酬唱簡棄塵俗惟讀書鼓琴用自娛悅卒年八十有七

王之柱字國衡諸生館貴人家有以千金屬居間者艱然卻之性醅厚遇孤孀尤有恩以高壽終

王化宏字充甫立道子少孤從舅氏唐順之學覃精六經修行謹飭子乾一字健公爲諸生三十年未嘗入縣治與馬世奇善世奇殉節卹其家且梓遺槩傳之父子皆老壽乾一子永積

秦竣字太清國子生耀子性純謹言動不苟貴遊子弟皆畏憚之壽至八十三從兄儼字太階亦高壽人推老宿竣子仲錫賢而多才受業於馬希尹希尹子世奇銘其墓

茹金字用卿高攀龍師也攀龍登第貽書京師極言勢家奴僕陵轢鄉里之害攀龍聽其言比歸講學東林金必上坐攀龍執弟子禮惟謹

秦坊字表行貢生操履純正長厚樂善置義田贍近族之貧者旣而族人欲以銀易米又求析田且指田索值坊應之無倦也嘗著範身範家集畧學者尊爲祭酒

國朝

周公謨字孚嘉諸生從東林遊而未嘗講學曰聖道舍孝弟忠信外無實學也子宏登上第益務謙抑質樸端重無卮言飾貌次子宜繩以孝弟聞

華景輝字曙生事母以孝聞從弟允斌無子雄於貲死有遺腹而族中皆利其產景輝力爲掌護及遺腹子授室乃籍而還之年八十卒著有存心養性編孫管音諸生有文名知縣林海山與爲文字交里人有構訟者陷以重賄求爲左袒管音卻之年七十五卒

秦德藻字以新父歿時祖父母具在祖父母歿泣血居廬如三年喪子松齡以族姑詭言太割亦或請自申雪

德藻命勿辨曰孀姑子幼辨之恐株連窮達有命不如安之德藻壽至八十五子孫曾元及見者男女百餘人仁皇帝南巡幸寄暢園德藻婆娑迎謁累被存問尤極榮遇云

高芷生字楚培世泰子早侍東林世泰歿搢拄講席數十年張伯行撫吳嘗親詣東林與諸生講論獨心許芷生晚年揭主靜二字於屏間不以耄而廢其家學也

蔣耆孫字大生遵路子以孝弟聞壯年卽棄舉業習經史教授弟子盛暑必肅衣冠燕居無惰容年九十一無疾而逝

秦松喬字鳧仙生長世家而修慎若寒素性樂善有叩必應天真爛然頽身童顏雖童豎亦愛而親之羣呼曰三老佛子孝然字石經貢生鉅人長德恭遇

純皇帝南巡秦氏諸老跽伏山園孝然年九十特荷

御詩之賜其歿也顧棟高志其墓

華允藻字天翼貢生吳俗溺女火葬允藻徒步數百里請當事嚴禁之歲施藥給樽廣刊格言以化末俗孫秉綱舉人任常熟教諭古道長德和易近人士子愛之

孫棟字伊重副貢生篤於嫺睦性好施不求人知褻躬方嚴裁物以禮鄉里敬憚焉

秦敬然字學伊恬然字師石皆松如子檢身持家矩度整肅教子弟尤嚴恭儉溫文鄉里以爲模楷敬然年至九十卒

楊銘朱字自亭少喜讀先儒書篤於孝友父紹雍析財產無所受祇取宗黨責券不能償者歸而焚之伯兄罷官有虧帑力爲補苴以善其歸於骨肉間誠意懇款無不周至歲饑司賑事人感其惠

朱廷銓字韶九貢生父肇祥富而好禮子姓彬雅廷銓爲家督尤尙恬素敦行古道恭儉而慈有流民歸產路隅俗以寄產爲不祥莫肯收卹廷銓命載歸調治彌月復

資之使歸其鄉

施謙吉字季吉康熙三十二年舉人授中書改寧都知縣著清節以病告歸喜啟迪後進秦道然贈詩云廿載春風培後學四朝玉燭介耆年年八十卒

朱重華字亮采居邑羊尖少任俠多智屬土盜胡鮑三爲亂屢招重華弗應寇亦不敢犯及官兵勦捕重華密營救無辜者多得解年八十七卒其族人匯字宗海樂善不倦亦以高壽終

王培元字孝文質行敦厚受侮不校里中多強暴培元以恭慎柔之垂三十年卒無能疵之者課其子起鴻敬止勤學皆爲諸生有名年至九十二卒起鴻侍郎會汾父也

李迪光字觀文諸生早失母遇諱日必悲泣父老病迪光衣常不解帶父歿三年不內寢好著述有四書講義正宗行世年九十四卒又強闕字大坤亦高壽嘗輯五倫類書三十卷爲巡撫徐士林所優禮

楊國藩字憲文祖省魁嘗輸米百石佐賑國藩內行醇厚和易近人尤好讀書至老不衰

華山竹字友鳳楊士登字尙侯二人皆敦本務實里中稱爲長者又皆以高壽終

施禹言字成允以歲貢生官安化知縣禹言為吏廉年老乞休貧甚不能歸從子鳳立挾貲而往護之歸鄒一桂方與顧建元等倡為十老之會禹言與焉性友愛與弟禹德終身無間言禹德亦事之如父鳳立即禹德子

胡在字澹園諸生為經師五十餘年循循善誘每曰循序則樂而易入躡等則艱而鮮功年七十七卒子履亨字秩宗亦諸生績學工詩文

秦春田字耕和實然子國子生少時力學從鄒升恆王繩曾游學使者將以人材薦會丁母憂不果性至孝居父喪年已六十猶哀毀過人晚年倡蠲義田年八十有八

卒長子鴻鈞諸生績學砥行教授四方弟子多掇科第而鴻鈞年未四十已罷舉子試安貧樂道家無宿儲座客常滿鴻鈞子瀛見宦望傳

王一峯字圖南繩曾子諸生事親孝親歿葬靖海門外一峯每日必展謁寒暑風雨無間工書法小楷尤精年九十六卒弟干仞工於詩與一峯並教授鄉里人推老宿

壽亦至八十九一峯子宮舉人才高而嗇於遇僅官達州同知寰進士授武寧知縣

秦夢蘭字文心考授主簿父尙烈諸生隱居庶渠以詩名夢蘭貌樸野而性情誠篤樂施子寡交遊人皆目為長

者卒年八十有五

孫文偉字匯川世居石塘灣性敦厚居家樸嗇而孳孳爲善如不及嘗偕其從弟璽等蠲置義田又特營家祠修建其里漢壽亭侯廟文偉既享大年璽亦高壽

朱勝章字耽環性謹厚尤尙敦睦嘗修輯家乘建文公祠於里皆獨任之歲歉助賑者再鄉黨中賴以全活人稱爲長者卒時年九十六

顧熙字玉田諸生喜玩性理諸書事親孝待人和易族祖建元輕財好施熙實贊襄之壽近八旬卒子應春字晴岡諸生誠樸有父風壽亦七十餘應春子鈺見宦望傳

王雲燦字硯英性方謹所讀書皆手錄生徒百餘人顧皋及從子珙皆受業壽八十餘卒

何旭字曰旦弟昶字曰明皆以諸生教授鄉里旭性坦易鶉衣破襪而里中咸敬憚焉昶喜周恤家雖赤貧人以急告必傾囊與之富室周鳳儀何仁山皆託孤於旭俱倚以成立絲粟無所染年七十餘卒

楊廷棐字翰文乾隆四十八年舉人授元和訓導家多藏書晚猶校勘再從子德墉字仲篋貢生敢於任事歷權長洲吳縣學篆選歛縣訓導以年老未赴卒

汪嘉名字揆度力勤事父色養惟謹練習時務非意見侮

無金金匱具元 卷二十一 三
悉不校好爲人排難解紛債券不償立焚之子士侃登
仕版嘉名示以祖詒嘉善畱衣圖勛之年七十餘卒

高祖德字映萊諸生教授里中其師顧龍光語之曰爲師
者一年令人畏二年令人愛三年令人敬汝無愧矣祖
德生平寓覽至老不忘言行尤不苟年八十六著有春
秋左傳集注

華昶字雨棠治申韓學事親孝置義塾以課子弟偕秦震
鈞倡建同仁堂集邑中好義者捐金助施絮衣棺構程
開泰捐地二十餘畝昶卽地營屋居貨以其直充經費
又設棲流所三以處行旅之病者年八十餘卒子希高

見宦望傳嘉植貢生歷署新陽震澤訓導爲人廉靜長
者族人湛恩著錫金志外多與嘉植商確年八十一卒
華光楣字謙齋諸生福建福清場大使年七十餘告歸家
居篤謹兄弟怡怡工詩著有冉涇草堂集壽九十二
王懋字玉溪諸生爲人沈毅以書法教授鄉里從學甚眾
七十餘卒弟霖字雨蒼國子生浙江按察使照磨亦能
書邑中公舉時襄辦焉年九十有二

杜文原字匯川貢生工小楷屢爲督撫主章奏後在浙撫
某署某坐事籍沒先一夕以兩篋遺文原文原堅拒之
年八十餘卒

錢昂字若干乾隆五十三年舉人授蒙陰知縣居官謹飭以註誤歸囊無一錢教授鄉里咸以清望屬之年七十餘同里嚴升曜字寅賓副貢生古樸醕厚壽八十二華瑞清字漱藝國子生能爲鄉里任事每有大役邑令必就詢利弊建望亭豐樂橋修鴻山泰伯墓皆瑞清爲之督卒年八十八

孫應穀字敬宜乾隆六十年舉人歷官賓州知州年逾八十解組歸健步如少年遇春秋佳日攜一孫逍遙山水間竟日不倦性和易近人後輩多樂與處咸豐四年重游泮水五年重宴鹿鳴年九十二卒

楊熙之字緝甫度汪孫度汪嘗著十三經疑義解熙之續成之中嘉慶九年舉人任元和訓導金壇教諭晚歸主講東林書院熙之工舉業爲時名師在元和造就弟子尤盛如張肇辰馮桂芬其最著者也卒年七十
嵇承濂字蓮叔璜季子國子生性耿介嘗鬻宅於某某致二十緡爲遷移香火承濂怒曰我獨不能自祭致我祖父歆他族之祀耶擲還之遷移香火者謂將徙家祠而設祭之費陋俗藉以索多錢者也承濂工行草書年七十六卒

龔桐字小梧諸生官路南州吏目吏循舊例納金桐卻之

曰吾豈爲此來耶性方嚴治家有法度戒子孫毋作佛事至今守之邑中稱家教善者推龔氏桐又能詩著有聽鶴山房等稟顧翰以爲神似東野云卒年八十子煜貢生有文行

趙藩字屏甫嘉慶二十三年舉人官池州訓導諸生某以訟事株連被褫藩爲白其誣而復之某生謁謝拒弗見藩少爲里塾師從游頗盛告歸後杜門課子以終年七十四

顧寶字存之幼孤貧弱冠投効河工官至葦塘營守備四十後卽告歸慷慨好施遇所當意千金弗吝捐田千畝獨建義莊優游林下五十年親見元孫有司循例以聞給匾嘉獎年九十三卒

秦文楷字朗山鼎雲孫貢生道光間與輯錫金續志嘗與楊奎斗許叶泰謀葺東林書院增拓課舍旣鳩工而絀於貲會鄒壯節鳴鶴以憂歸里力主之事乃大集文楷性渾厚治身及訓子弟恆以慎獨去私爲本卒年七十二著有誦芬書屋詩藁

過宮桂字印川貢生篤學能文授徒鄉里嘗偕外弟周雲桂省試雲桂暴病遽送之歸而宮桂竟以三場未至俛得復失少受業於族子太和太和貧無子宮桂恆資之

及卒謀諸族孫人遠等置田奉太和祀同治元年

詔舉孝廉方正邑中議以宮桂應力辭而止卒年七十五

侯景字紀之道光五年舉人由沈陽教諭擢知縣歷署建

德安吉建德以鄰境陷賊戒嚴有黃梅木商等過境武

弁誣為賊謀景白其冤安吉鄉民索賑滋事景甫履任

往諭之即解散以年老改教再選山陽教諭卒於任年

八十一

無錫金匱縣志卷二十五終

無錫金匱縣志卷二十六



隱逸

易稱蜚遯又曰幽人貞吉是必抱濟時之才無所用於

世不得已而矜高蹈之節固非僅山澤之癯所可同日

語也無錫高士倪瓚樂志沈冥翛然塵壒之表其風邈

矣他如李琛輩不應辟命以及勝國遺民終身韜晦多

可錄者若自號通隱比於种放陳繼儒之流槩無取焉

志隱逸第二十九

宋

錢道人顛弟隱惠山亦號惠山山人與蘇軾游

按錢道人屢見於蘇集中而不著其名志外云名穎未知何據

尤山字元鎮煇曾孫太學生宋亡杜門不出隱於許舍山故居或勸之仕曰吾家三百年科第十世冠裳宋恩渥矣何忍失身二姓其從兄司徒玘對之輒內愧云

按舊志均作其從弟司徒玘茲據尤氏譜改

元

侯德宗字友泉尚志不仕隱居城東之六箭河子希道慕希夷之為人日晏坐一室讀黃老書澹如也孫永常亦以隱德著

孟棐字仲良號九龍山樵有先塋在惠麓因家焉兄弟皆出仕棐獨隱泉石間事親孝強敏多能尤工繪事嘗避兵海上轉徙流離晚年仍歸隱惠麓以終

倪瓚字元鎮居梅里之祇陀村世父煥砥節礪行元初嘗辟為桂陽主簿不就父炳性清約亦隱居樂道瓚所居清閤閣藏書及古鼎彝書畫甚富至正初天下無事忽鬻其產散與親舊人莫喻其意未幾兵起獨扁舟往來震澤三泖間張士誠聞而欲禮致之不可其弟士信乞畫又不與士信恚欲辱之嘗從賓客遊湖上聞異香出葭葦中以為必瓚也物色漁舟中果得之扶之幾斃終無一言洪武七年始還鄉里卒於其姻鄒惟高家瓚名

聞外國使有過者操沈香百斤為贄求一至清閔不許
乃再拜去其畫簡淡世推為逸品第一與黃公望吳鎮
王蒙齊名有元四大家之目自署名曰懶瓚又嘗號幼
霞變姓名曰奚元朗或曰元瑛亦稱荆蠻民淨名居士
朱陽館主蕭閒卿而雲林最著瓚雖終於明初而鼎革
後書畫俱不署年號但書甲子而已故仍繫之元以比

陶潛云明史有傳

明

李大椿字茂卿有文學義不仕元隱居梁溪之曲洪武初
以大臣薦召為御史附使者疏辭因上太平十二策帝

嘉許之

周翼字子羽工詩元末不仕

李琛字伯器宋尚書琳八世孫元季避兵嘗挾先世譜牒
誥敕自隨天下已定歸蓉湖徙邑之南市橋教授生徒
以養其親尚書張籌每招之仕輒謝舉孝廉不就與浦
源趙次鈞輩為詩文之交號雲泉生孫幾字桓仲亦飭
行工詩不應辟命與弟戢俱有名

華棕韡字公愷幼武子宗韡有學行元季奉其親避居蘇
松間世平始歸梅里故居耕田讀書輯冠昏喪祭之可
通行於士庶者名曰慮得集洪武中累徵孝廉通經儒

士皆不應

華希顏字以愚少入國子監洪武初以明習春秋徵授本府訓導踰年卽告歸隱居東湖賦詩自娛亦善畫山水尤文字文達家迴溪父居敬嘗鑿池獲金悉施貧者民德之稱其地爲尤圖文弱冠讀程朱遺書及遂初集探其淵源有千駟弗視一介不取之意洪武中舉明經秀才不就永樂十七年詔舉孝廉得十五人文與焉行人盧玉齋敕書徵之以母老辭學者稱務樸先生

顧協字允迪隱居勵志操行端潔工詩與王達王紱友善有華恪者字叔端稍後出作詩不尙瑣績二王引爲忘

年交恪子藻澤亦不仕能詩

周世忠字士行少厲學問讀書僧舍三十不娶嘗避亂入吳有勸之仕張氏者不聽吳人丁仲舉高其行妻以女乃買田定居於邑之揚名鄉而隱焉從孫益幼孤育於世忠亦好學不樂仕進自號樵野

過儀字廷章魁岸風流擅詞翰善畫作長松特妙亦能小景有司薦於朝不就自號聽松道人

顧恒字成之抱藝高蹈與其兄泰及楊永年丁煦王治隱嵒崑山中年皆八九十明州劉與竹爲繪五老圖

周祐字惟吉有詩文名與同里鄒驄俱有隱操而驄不拘

小節為歌行立就別字梅雪

秦旭字景暘父季昇有隱德旭亦不仕工於詩晚結廬惠山之麓與李庶陳履陸勉高直黃祿楊理陳公懋施廉潘緒輩觴詠其中名曰碧山吟社旭雖以子夔貴而退然謙約如韋布以德量見重里中有不善者輒相戒勿令旭知卒年八十五友人私謚曰貞靖先生庶字舜明幾子善為詩文而不欲炫露故自號絅庵正德元年詔行優老之典庶受粟肉絮帛而辭其服嘗與吳紳同修錫山志緒字季芳至孝而精於醫詩文清古社中人皆高年獨緒未滿六十諸人重其品援以入焉後楊文再

續吟社緒為祭酒

陳鳳字羽伯周子讀書習隱月夜挂琴松間調所馴山猿得詩擁膝長吟與猿嘯相應又自號石村山人好結客父黨王問以下皆造焉子以忠見宦望傳

顧台字世叔篤行有文本生長紛華心厭之避而之溧之投金瀨又不喜避而之吳皮市又不喜時時寄居浮圖老氏之宮敝衣破履率意去來不修禮容對人非故知未嘗出一語人亦無知之者

浦繼巖 逸其名

少負豪氣中歲便棄家築室於嵩山食淡飲水隔絕世事垂三十年吳桂森嘗書靖節詩遺之

華應象字心白性孤僻家貧不營衣食好遊山水人皆目
爲華高人嘗仿王紱製竹茶鑪有題詠見吳桂森息齋
筆記

高世甯字季遠攀龍季子也少邁家難息情進取當得任
子不就手輯忠憲年譜抄遺書凡數帙至於朝章國典
文學掌故之私記及委巷舊聞無不究悉當與人雜處
談諧間作或於眾中忽發驚世絕俗之語晚更韜晦惟
好山水書畫時焚香靜坐作水墨梅花以寄意

華時亨字仲通父珍聘諸生與高攀龍友時亨亦學於攀
龍方緹騎赴吳逮周順昌珍聘遣時亨先以告攀龍攀
龍赴止水死巡撫毛一鷺究漏洩者將殺之以媚璫時
亨匿而免蕭山王生繫獄時亨因倪元璐之言爲鳴其
冤於推官出之甲申後失明日坐劒光閣屏絕人事惟
與子弟講論攀龍之學

許儀字子韶工詩文善畫尤精於花鳥崇禎朝薦授中書
舍人丁外艱歸服闋值鼎革遂棄家放浪山水間自號
歇公閩人林茂之棲寓乳山儀往從之相與酬唱茂之
嘗曰歇公皋羽所南儔也遊吳門疫甚因製方藥濟人
輒驗晚歸隱於邑之石門黃冠草服足不下山年七十
一卒儀好鶴稱鶴影子又稱了塵道人

張列宿字惕菴諸生鼎革後避居陽山陽湖間爲詩文多酸楚之音命二子經緯並棄諸生籍季子光緯字次民殫見洽聞隱居著述有青巖集若干卷

吳明珩字頌筠居閩江少工舉業已而棄之家貧不事生產嘗日晏未炊家人相顧有饑色明珩方讀書笑曰汝輩慍見耶因爲講富而可求及求則得之書數章家人惡其迂次第避去明珩恬然自如而明珩性至孝自以母老孤煢無所取給輒歎曰爲子若此何益有無又值鼎革稍焉自傷每獨行山巔四顧蒼莽執竹枝擊石歌曰天高兮不可知身煢煢兮生我何爲極目望兮將安之歌闕長號不自禁明珩博綜羣書詩文古雅與族人濯時並負清才而明珩介特竟以貧賤老

華慶遠字子嘉齟齬隨父適虎邱時方營魏闡生祠問其故卽卻立不視旣壯好劔術鼎革時鄉多盜流寓吳之嚶關陸墓畫始遷祖以下像置之行笥及圖書數十篋轉徙必以自隨亂旣定乃歸葺屋竹間曰物外閒居雜蒔卉木籬落環之竟日讀書暇則灌蔬畚圃不復見客有貴人徒步往訪歎扉自通遙見慶遠在花下負手徐徐行曰謹謝客乃歎息去慶遠詩長洲汪琬敘之

鄒初基字白心少爲名諸生累試不遇乃棄去窮覽經子

百家之書勇於纂述其學尤邃於史凡朝章國故靡不
究心鼎革後遯居村舍時託歌詩以見志晚逃於禪號
樗全子秦松齡銘其墓

顧柔謙字剛中家於宛溪少孤邁家難長贅譚氏自傷不
得養母致疾幾殆其外父爲別置宅使并迎母以來病
乃已國變後棄諸生常閉門默坐或竟日不食子祖禹
叩頭寬譬乃曰汝能終身窮餓不思富貴乎能以身爲
几上肉不思報復乎祖禹應曰能乃大喜曰吾與汝偕
隱耳遂更名隱字耕石善行草尤喜篆刻詩工古體著
有補韻略六書考定及耕石草若干卷長子祖禹最知

名次子安世有奇才早卒

黃道明字在龍好弈閉戶獨居操白黑子分行相攻殺不
求耦對人稱曰獨弈先生道明好施與有德於鄉嘗陟
山遇盜盜詢之爲道明相顧笑曰無驚我公送之山下
盜焚鄰人居延及道明廬盜羣起撲火火不滅乃共捶
始禍者於庭

黃庭字守中少任俠與常熟范晉同里顧祖禹善後祖禹
游四方爲公卿上客而庭終身屏居膠山祖禹時過訪
之或衣冠少易其故庭厲聲訶責祖禹亦遜謝無忤色
有嘉興人李譚避難依庭旣死遺寡媳庭訪其宗爲立

後鄒溶被逮入都庭貽祖禹書屬爲營解得減死論成庭與溶故不識也家奇貧客至或不能具食族有饜再醮契列庭名夜叩門納米五斗庭詰得其故怒麾去時不食兩日矣里中子弟或嬉游過其門必相戒毋妄語亂步其爲人敬憚如此晚歲深自韜斂掩關製硯特精好云年八十餘卒

黃家舒字漢臣自少稱高才生與孫源文善甲申之變源文殉節家舒遂棄諸生服坐臥斗室謝絕交遊自名其集曰焉文堂集以見志知府宋之普聞其名欲一致之不可得體羸以病自廢修淨業無子門人馬獅刻其遺

文秦松齡序之

華東觀字若木工詩有奇力順治二年大兵平江浙東王觀聞湖州白將軍尙死守城未下糾死士三人往救之甫至數日城破將軍死三人者亦亡其二東觀與一人同被執尋逸歸潛土室中東觀弟字若拙者家富甚踪跡者時至其家產爲之破事定始稍稍出常往來金陵於驢背作休休歌

張遜字素臣少時篤志力學值鼎革幅巾方領鍵戶不出其婦翁貴頗橫遜有租負皆不責償曰人將謂我倚婦翁因是日窘窮以老將卒召其門人講孟子舌本木強

以湯潤之日昃命退因就寢移時視之逝矣

周憲申字憲之以祖炳謨廕官戶部主事福藩南渡遂隱去不知所終徐枋避跡長泰寺嘗一遇之

薛瑾字朗生諸生有才氣常游關隴踰太行抵漠北航海而歸博稽輿地形勝務爲有用之學鼎革後屢徵不起
盤屋李暉榜其室曰守齋學者因稱守齋先生仲子儀亦諸生隨父不應舉晚乃遁於蘇之鄧尉山卒遂葬焉
王昭吉字夫吉諸生受學於高攀龍鄒期楨之門易代後野服緘口不交世務年七十一無疾卒著有天倪齋集
秦德湛字以雪諸生爲學務躬蹈實踐鼎革後屏居小樓

足跡不履戶庭二十餘年慈谿姜宸英爲之傳

邵應奎字樂山諸生與華節愨允誠同學允誠殉節後應奎杜門三十年孫璿別有傳瑚字商六不仕有祖風

國朝

李崧字靜山其先江陰人祖國綱徙居邑之嘯傲涇崧不樂仕進與其妻隱居高蹈工爲詩而妻吳及繼妻薛並工詩伉儷間自相倡和於榮利泊然詩名日益高其詩簡古澹泊樸至有真味間畫花蘼蘆鴈時露天趣年八十餘兩目盡盲猶口占詩令其幼孫書之於鵝湖之濱預封一龕曰白雲窩死卽葬焉

華坡字子山少與顧貞觀杜詔等爲詩社亦善畫晚隱居坊前之鄒莊流水孤村柴門一曲興至則吟小詩或解衣盤礴終歲甚閒除夜獨子子有事或問之曰古人祭詩吾兼祭畫取一歲所作詩稿畫本享以乾脯酌以旨酒聚而焚之

楊維甯字紫淵卜築湖濱之管社山規湖爲池築隄植椶養魚種芙蓉蒨艾不絕翦木燔石搜剔巖壑迺置層樓別館高亭曲榭於湖光山色中維甯率妻子偕隱讀書賦詩布袍草履與漁樵爲伍客至非意所欲見輒拒弗納意所可則延欸之亦無俗賓至性剛直膂力絕人而

終身不言武事

周王遵弱冠爲童子師數十里中半其弟子喜吟咏芒屨布衣課徒暇率子孫力田未嘗一入城市邑令吳鉞聞其賢聘之不至顧光旭見其詩徒步過訪歎曰吾鄉龐德公也

[Faint bleed-through text from the reverse side of the page]

藝術

書居六藝之一而畫亦游藝之餘事士大夫文章行誼卓然表見於世間或怡情毫素正不必以是爲重而專門之學如劉浩以下諸人亦彬彬焉至若扁鵲之技日者之術見於史冊旁逮占卜琴弈百家九流毋亦所謂小道可觀者與撫拾舊聞附以近人之較著者一藝必錄彙而輯之志藝術第三十

宋

劉浩紹興中人善作窠石人物子顯能世其學
許穎字子由善八分書所製筆亦精妙

無錫金匱縣志卷之二十一
明

郎成工楷法臨佛遺教經得其神致

茹洪字仲宏一字樊明質敏好學工書畫作窠石竹木法

郭熙爲山水氣韻奇古永樂中以楷書薦召入都預修

大典授壽光丞

沈洪字巨源彭戢字汝翼咸以楷書著名稱江東二俊被

薦入都預修永樂大典洪授戶部郎中戢授安樂丞擢

衡山知縣以廉勤稱

成性字大章成化中貢官教諭工山水人物風度瀟灑筆

法出范寬夏珪之間

陸勉字懋成碧山十老之一工畫尤善大書一時題額多

出其手

莫懋字雲樓任俠有勇力里中戲集壯士百人圍之一躍

而出歛如風雨壯歲折節讀書遊賢豪長者間畫法郭

熙高克恭尤好爲張旭狂草題詩其上晚作一松巨石

圖最自賞愛令王仲儀貌己像於松下懋子息宏治十

二年進士與王文成守仁遊文成因爲題讚焉

葛有恆畫梅有名與聽松道人過儀善

陳穉字有實國子生能詩及書畫花鳥入黃筌古紙中幾

不辨邵文莊寶曾乞穉作萱草圖爲母夫人壽

盛虞字舜臣，顯從子，畫仿雲林筆意，高古性倨傲，不輕與人作。嘗得雲林秋亭野興圖，畢力摹之，因以秋亭自號。又仿製聽松庵竹壺，一時名流多詠其事。

張廣字秋江，曾祖德先，洪武中以都指揮使奉命守無錫，因家焉。父綬，分教東陽，有文行。廣善書畫，嘉靖中徵入京，待詔內廷。世宗見其萬福圖，賞之，命盡進所畫。於是宦者共屬廣為萬壽圖，將獻以邀寵。廣辭疾不可明日，探之已南歸矣。

談志伊字思重，愷子。以父任官中府經歷，會星變，汰庶僚，歸屏跡園居。極圖書鐘鼎聲歌遊宴之樂，既而遭家多難，先業蕩廢，乃盡斥餘產，攜橐中裝走金陵，逐遊冶，頹然自放。久之，疽發背，卒。志伊穎敏，多能書學，曹娥碑更精繪事，作花卉翎毛，點染娟秀，出宋人法外。

盛顏字時表，善楷書。初宗沈趙出入，王宋筆勢適勁，時稱大家。貢禮部廷試第一，不仕。終孫鑿字朝新，有才名。萬曆中與修無錫縣志書，亦入妙。

顧祖源字元濬，工篆籀小楷。萬曆中修世穆兩朝實錄，詔選善書者，祖源被薦，授中書舍人，累遷禮部員外郎。

陳言識小錄作陳公言字國楨，勉子。居兄喪，不飲酒食肉者三年。書法晉人，畫仿趙千里，性廉倨，不徇人請，竟以窮死。其

友尤鏗為營葬焉

徐孟潛初名孟潛善畫花鳥有遺幅為瑤人所得萬歷中大內便殿成欲畫殿壁上見畫幅賞之有詔馳驛赴闕授中書舍人賜名孟潛

周訪字龍溪與白陽山人陳道復善因工畫花鳥既而作山水師王蒙貧甚不以徇人求者非其人終不可得

吳三畏字常惺能詩工懷素草書薦授武英殿中書嘗作錫山遺響十二卷

吳應卯字三江長洲祝允明外孫習允明書輒能亂真亦能畫作小景平湖遠嶼得李嵩家法

張復字元春畫法梅道人為人溫厚長者故士大夫樂與之遊

林存義字敬坡工花鳥類陳道復子梅世其學

國朝 吳瑄居梅里自幼未冠稱九蓬頭善畫人物瀟灑絕俗

華胥字希逸善畫人物與惺壽平花卉王翬山水並稱秀麗豔逸所畫老子出關圖最工

華鯤字子干孤苦力學工詩畫貧甚至數日不炊乃浩然北游京師為太倉王原祁所賞由是知名繼以太傅明珠薦授光祿典簿鯤奉母孝有弟五人皆教育之為畢

婚娶百口同居內外無間言及鯤子龍皋猶未析爨

邵曾詔字衷綸兄曾訓善書曾詔善畫時稱雙絕其繪花

鳥秀麗絕倫遊京師公卿交推重之孫珣紹其學

周復字文生善畫竹石筆墨森秀本武進人後居無錫

蔣元治字煥俞寫山水氣韻高潔游虞山爲秋林平遠吾

谷踏葉二圖王翬見之歎爲合作弟元令字嘉俞山水

法倪黃尤工寫真元治子綸少工畫早卒

胡蕃字義人善畫山水嘗應莊親王召至京師王翬於邑

中能畫者許蕃爲成家

計長發工畫山水筆墨蒼勁參用北宗神似藍瑛閔作工

筆千巖萬壑點景細密又近似邵彌

俞大猷字軒臣工花卉娟秀特甚然不輕作故存者絕少

案道光續志有俞大鴻字軒臣以下云云皆與此同當是一人而誤其名續志又稱子瑩字敬亭亦工書畫

蔣震字大復工寫生法其山水尤蒼秀著名於時後有黃

尊亦善繪事長於畫馬兼以騎射著

華沅字慎思書法歐柳尤工繪事壯遊四方無所遇晚益

貧賣畫自給自號秋田老人

吳楸字逸泉工畫尤善寫真名重公卿間性情高簡不事

干謁筆墨如其人無俗韻子省曾亦有名後有許達泉

者諸生獻子嘗以其技游湖北巡撫梁國治頗延譽之

以酒病死獻管與乾隆庚午志參訂之事

秦銑字南珍諸生善畫山水學文徵明花卉尤勝工於臨摹時尙書鄒一桂在籍人購其畫不易得銑輒代為之觀者莫辨真贗也年八十餘卒

姚仔字笠山工山水人物鄒一桂嘗以其所摹嚴泃曾畫佛數幅進呈

李點字撰春工寫真筆法高簡神理自足同時有華烜者父鳴岡善星卜而烜以寫真著

朱志鉅字湘楫寄籍浙江以歲貢得訓導詩文書畫靡不工妙著有研山草堂詩文集子宗瀚亦以書畫名

蔣和字醉峰起元弟精篆隸兼能詩畫少游京師充四庫館篆隸總校乾隆五十一年

賜舉人時命刻蔣衡所書十三經於石以和董其役補國子監學正引疾歸所著有竹譜行世

華淞字半江諸生王澍弟子工篆書能以尖穎運枯墨兼工鐵筆一時名流競購之淞故貧藉以自給嵇承濬得其法以授孫介福並有名同時袁泓亦工篆書子宮桂承其學

華冠初名點字吉厓善繪出於天性童時就塾客有訪其

師者冠以寸紙寫其形鬚眉畢肖比長藝益精

高宗南巡恭寫

御容稱

旨賞賚優渥嘉慶初徵入都供繪事與修永樂大典議敘
官廣東任佛山黃岡同知以親老乞休家居蒔花疊石
以自娛年八十餘卒冠兼善山水花卉晚年所作尤幽
秀絕倫人推逸品其友王玉海由四庫館議敘任蘄水
縣丞亦工畫

嵇承咸字子進工山水受學於鮑汀寸縑尺素恆自矜貴
與兄承濬友愛怡怡一室索畫客常滿同時吳錫桂王

鵬運皆諸生工山水方遂源亦諸生工蘭竹並有詩名

楊黠字文山多讀古畫作翎毛花卉枯槎竹石落筆灑脫
摹憚壽平幾可亂真

竇廷槐字公旦國子生勤學書力摹智永千文晚年深入
晉唐之室楊湘字春帆心貌古樸能作擘窠書迥逸豪
邁稍後陸雲程字澹園諸生能詩文兼工小楷

錢泳字梅溪國子生能詩工分隸行楷客京師爲成邸所
知詒晉齋帖皆泳判定手書碑版幾徧江浙又所摹漢
唐碑及縮臨本刻石傳世者尤多嘗倡修錢唐武肅王
後諸王祠墓及表忠觀輯鐵券金塗塔考年八十六卒

常熟翁文端心存銘其墓

顧應泰字雲鶴諸生能詩工白描人物筆墨冷逸如其人少與顧皋善及皋宦歸屢造訪而應泰未嘗一至其第有貴客挾貲求畫卻之

施蘭字芝泉國子生嘉慶中客總督百齡所嘗從往徐州防堵教匪將保薦力辭蘭工書值

萬壽節巡撫陳桂生上其所書無量壽佛經得

旨有神似趙孟頫之褒晚寓蘇州賣字以終

龔大夏字聲和廩貢生工書法

王芝林字人月嘉慶十八年拔貢生以親老不赴

廷試能詩善書文廟佾舞久廢芝林倡興之購置樂器與諸生童討論肄習他邑亦聞風踵行

邵涵初字吟泉道光五年拔貢生官阜甯訓導擢南和知縣以疾不赴歸宋李太師墓址爲土豪所占訟而復之與輯錫金續志晚嗜形家言著有學易反隅堪輿指原諸書涵初亦能小篆與同郡先輩孫洪爲近

楊伯燠字芝田父燦工寫生伯燠自幼得其傳設色尤雅淡有致晚年右手病廢以左手代之猶揮灑不輟卒年八十三著有畫則一卷

王言鑄字伯陶道光十七年順天舉人官內閣中書工小

楷

孫顯字勛三諸生性閒逸咸豐中嘗借浙省試顯方治具入場忽自歎曰所以爲此者以父母在耳親已歿烏用是爲乃獨游湖上而歸善以枯筆作山水爲小詩輒有遠韻兼精卜筮一日與客弈局未終起入內卒侯煒字石琴同治六年舉人工八分書亦健於文

右書畫

明

施仲模世業幼科子中立爲太醫士孫澤民潤民濟民始兼通朱李之學術遂盛行濟民官訓科子廉字彥清精

脈理每危疾諸醫斂手廉輒起之宏治中以明醫徵至京師不受職而還能詩爲碧山吟社十老之一族子言諫並以醫名族孫教尤著別有傳

施存善字昌宗永樂初詔徵除韓王府良醫副宣宗召拜御醫賜詩宴文華殿以子安累進奉政大夫安子元濟歷官太醫院使卒賜祭歸葬錫山父子歷仕七朝數蒙褒寵當世榮之

施教字子承五歲喪父研精儒學久不遇乃就世業診切若有神遇其治專用人淺取效子病寒首用淺劑至三錢三日而愈人問故教曰百病從虛入風寒暑溼何日

不損耳目口鼻何處不損因其損補之氣實則病去矣
 故一切以人瀆為主他藥為佐然他人效之不能如教
 百不一失也求治者毋問貴賤貧富皆濟之好施子樂
 周人急士大夫時相過從不獨以醫也子策官太僕卿
 魏思敬祖叔皋元本州醫學學錄業婦人科思敬及子公
 哲孫宗美並世其業宗美官醫學訓科子朝器孫鏞亦
 工醫

潘仁仲祖傳之在元為常州路醫學學錄父進德本州醫
 學提舉仁仲楊維楨門人與倪瓚張居貞輩遊為醫學
 教授晚以高年應詔子克誠永樂中召為太醫院醫士

與王達錢仲益友善克誠子韞輝尤妙鍼灸官訓科

黃樸菴逸其名外科得異人秘方其後叔洪師善者兼通大

方脉師善子祿工醫而能詩

張用謙深究朱李著有醫方摘元同時有徐吾元論運氣
 甚精博有醫經原旨

孫貞字恒心博綜軒岐書遇異人授鍼訣有貴官左手不
 仁已一紀餘貞鍼治之宿疾盡去乃集屬吏謂之曰此
 醫殆神授也好方術卒傾其貲

周濟廣名紘以字行外家金氏工醫遂精其術瘍疹婦人
 諸科無不通曉名滿吳中成化間以明醫徵至京師引

疾還每診人脈預知人生死無不驗者子敷牧孫駢皆世其學敷亦有名王鏊表其墓

寶良茂字樸庵博學工醫爲邑醫學訓科良茂孫時望治患瘍七年者卒起之時望子楠能詩徵醫士不就邵文莊寶作乳泉記載其醫術之神楠子夢鶴從王問遊敦學行夢麟嘗註寶默瘍醫全書

徐孟容醫士其妻陸亦善醫名聞於朝永樂間中宮遣內侍召入宮既老遣歸賜資甚厚

徐某號愛杏山人善醫尤精金創雖垂絕者治之無不應手愈蓋其父傳之異人云武進唐順之嘗贈以詩又書

其醫施氏婦事

尤仲仁字依之以喉科名初御史周清嘗白一中官於大獄餽秘方十有七周死而甥得之卽仲仁祖也
司馬大復字銘鞠諸生其醫得傳於常熟繆希雍繆所著廣筆記往往載大復語言飭行馴人禮重之

國朝

華擣藻字麗涵諸生去爲醫得傳於雲間李中梓遂世其業

許至字芳墅工醫恒製丸劑活貧病者不責其報喜爲詩篆刻亦精詣

施廷銓字鼎臣教元孫諸生康熙初以明醫徵授鴻臚寺序班冊封琉球充副使

杜有功字昇侯諸生父元美善醫有功得其傳雖奇險症應手輒愈而不責報貧人尤德之呼曰醫仙

沈文淵字釋明少多病習醫以自治繼遂能活人邑大疫當事徵之所投卽起性最慈祥凡鯨寡及婢僕乳媪延之立往曰此輩求醫最難不可緩也

張經始字民沾精岐黃家言兼工文翰溫雅有士風士大夫皆敬禮之

許德基字承垣擅嬰兒科祖重熙父世煜明天啟間官太醫德基心和厚遠近神其術二子鵬鵬繼其業時許之嬰兒尤之治喉朱之接骨皆邑中所推專家及鷓子岱名益振且以敦睦稱於士林

許昭字來茲多讀書能詩以稟弱習醫治病不責酬尤急寔人子必與善藥性抗直不少挫一勢家輿役死先數日與富室某角口以此牽連申報有司昭嘗與診息知以病死比對簿或餌以利不顧直前白之獄遂解

柯懷祖字德修工醫嘗入都名噪公卿間其言不知天地人不可與言醫輯理虛元鑑等書行世稍後有朱世揚字淇瞻善岐黃術所著有誠求集其同里華虞薰學於

世揚亦名於時

王鶚翔字心一國子生少習醫貫串於靈素難經諸書以意爲變化而不泥於古所投無不效貧者資以藥餌而不索酬同時有徐涵字兆京爲瘍醫甚危險莫能治者涵立起之

曹杲小兒醫遇危疾輒應手愈元孫桑曦尤精其術貧者每贈以藥餌資不望報桑曦子鑛孫晉桃皆世其業吳廷桂字東山精岐黃於傷寒洞悉微奧著傷寒析義十四卷灰餘集六卷

葉大椿字子容精於痘科症無危險應手卽愈人以神醫目之有痘學真傳八卷行世

許叶熊字太占精醫術能以金針開瞽與殷耀奎齊名稍後有高梅字雲白著嘗藥本草八卷堵西洲兼治內外科穎悟過人疑難症全活無算同時查玉山治內症亦有名

黃鐘字樂亭善醫疑難症應手奏效不責酬人餽之亦不辭貧者資之藥物敦本好施伯叔早卒無子竭誠事諸母伯母有女寡迎歸與母同居數十載親友之貧者養之終身不倦手輯解圍元藪古本行於世子瀚亦有醫名

高秉鈞字錦庭性抗直工醫求治者應手輒愈貧不索酬兼資以藥餌著有心得集孫爾準為之序

右醫

明

尤鏊善琴有別墅在春申澗下時攜琴對流泉彈之因號

琴泉散人

唐理字孟清永樂三年舉人官陝西河渠提舉好弈常於陽羨山中遇蜀雅州道士買茶者與對局三日夜遂為吳中第一家有竹素園楸枰滿座諸妾臧獲無不能之其婿顧義得其傳久之與理爭勝負焉

施顯卿字純甫嘉靖三十一年舉人知新昌縣素精於弈老而彌篤無能先之者既而北郭有祝萬年忽起而勝之後又有秦延壽萬曆二十八年舉人更出萬年上過文年字柏齡以善弈游京師天下高手築壁壘攻之者無遠不至卒皆屈於文年遂羣奉為國手自是數十年天下言弈者以文年為宗其人馴雅有士行在都時大學士葉向高禮而客之秦松齡為之傳

國朝

沈鳳來字右山父汝愚妙解琴理常熟嚴澂趙應良皆兄事之鳳來嗣其家學兼參眾長造微詣極尤善歌詩酒

全金全圖馬元 卷二十一
三
酣發響激揚中節家素貧葦簾紙牕常自操所度曲聲
徹戶外性和而介抱絕技不事干謁竟以貧死

周士申字西侯弈中高手與黃龍士徐星友相頡頏吳興
祚延致幕府日與對局一枰所獲常不貲而士申性慷
慨隨手散盡周人急難揮千金弗恤也

惠雲字閻孫善弈爲詩亦有佳句有假其金者以臥榻償
之雲往取視其家榻外無一物詢曰榻去君夫婦誰所
臥者其人答曰地可臥也雲慨然曰若貧竟與吾等耶
擲券還之

楊廷果字令貽性閒逸生平不應有司試與吳峻王宮善
書學宋人微乏風骨善鼓琴兼工琵琶自製一曲曰潺
湲引嘗抱琵琶踞虎邱生公石轉軸撥絃聞者以爲絕
調家藏米黻帖及蘇軾畫竹客覲其貧欲指困易之不
可歿以爲殉

嚴惟仁字全如乾隆初以弈名諸名士皆樂與交
嚴錫清字振玉善弈爲人寡言好靜與人弈終日不過一
枰人稱爲嚴一局同時李步青才思較敏並稱國手又
有堵兆麒善醫而嗜弈遜於嚴李

竇益以善弈遊京師一時推爲國手官盧氏巡檢

右琴弈

國朝

朱鎬字岐載工篆刻以薦官翰林院待詔

侯文熙字曰若意度瀟灑能詩尤精篆刻宗文三橋而蒼勁過之客京師垂四十年名著公卿間前此以鐵筆名者有倪雪田呂柏庭高培而文熙後起游聲最久王度得其傳他如周心鑑以桃核船名尤氏以犀角飲器名皆擅絕藝而桃核船更出鬼工臆楸餅供開闔生動婁東吳偉業有詩今亦有精其技者

右篆刻雜藝

明

姚逢舜字虞廷精天文洪武初徵入欽天監

國朝

談丁戊字宏周深於授時厯法著厯學末議
楊作枚字學山初受家學於其祖國鈞字定山著厯法大成十卷而所精者中厯也中厯即授時法精而未密至西人三角弦弧之術興而方員冪渾隨所施之無不盡妙其法宣城梅氏文鼎得之最深作枚嘗從文鼎遊後入算學館掌館事者即文鼎孫毅成也欲官之遽卒鮑祖述亦精西法

倪榮桂字月培諸生嗜學能文究心天文象數諸書及青

烏家言著有中西星要二卷

右厯算

明

孫紹先字振之隱居橫山好彈琴精曉術數庭有古松每
爲人言吾與此松同壽及年七十九病篤謂其子曰吾
不死松當先我七十日而殞又七年重九大風拔木松
仆紹先果於是冬卒

王若水字一清神骨疎秀博學通道術其子爲卜葬地於
芙蓉山若水易筮謂二子曰五十年後此山下有大水
當吾家可更之子乃改卜宏治末蛟起山麓淹爲巨浸
推之正五十年矣

顧節字公理性伉直面折人過常減息緩急於人然所殖
益厚善許負術自謂其女當大貴時邵文莊寶三歲喪
父家貧節一見喜曰吾女之貴乃以此子也卽許字焉
後撫視之人服其識鑑

華善繼字孟達精星術著有三命珠鈴璿璣抉微五星元
珠等書其學直抉躔度歲差之秘時爲天文學者不能
及也

唐古風者不知其名善相術爲女擇婿見張惠安國維於
崇安寺曰此可七品且多男而壽足矣乞張所善顧舉

人應龍為媒而納女焉是歲國維舉於鄉一夕宴其同年古風坐而觀焉曰郭龍潭顧少岩皆不久於世錢虛堂華石門周傲菴皆有貴子而傲菴爵甚高惜不甚永年耳其後言悉驗

施仲達通易理善卜筮乾隆時河督高晉延諸幕中使決休咎皆奇驗後游於都益有名子孫傳其學

朱耀字旭輪恩貢生工舉業晚游廣西河南以堪輿術著公卿間性友愛所得館穀輒分給兩弟及寡姊妹未嘗自私著有宅法舉隅

章甫字仲山博涉多通習形家言精其術著有地理辨正直解心眼指要等書

右術數

明

陸憲者其先在元時為可兀蘭之屬華言將作大匠也憲官諸路工匠都總管贈中奉大夫備院使陸藏仕終保定路諸匠提舉洪武初鼎建宮殿有陸賢陸祥兄弟應詔入賢授營繕所丞祥授鄭府工副食營繕郎俸歷事五朝至帶銜太僕少卿累加工部侍郎賞賜累鉅萬賜飛魚服犀帶官其子姪四人祥年九十餘卒賜祭歸葬錫山

右工繕

無錫金匱縣志卷二十六終

